

Eprêw Ijaew hwÿr kagà

Kagà ja na pre Ijaew ò amnhĩ kwÿjê mã hipêx nom mẽ pahte hipêx xwÿnh nhĩxi mar kêt. Na pre tanhmã hamaxpêr to nê amnhĩ nhĩxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uràk nê Jejus kôt amnhĩ xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pê Eprêw. Jakamã nhũm kagà nhĩpêx xwÿnhja mẽ hwÿr hipêx nê kumê. Nê kamã mẽ kām mẽmoj jarēnh rax nê tanhmã Jejus jarēnh to.

Nê mẽ hkwyjaja hkwyjê hkĩnhã kām Jejus prām kêt jakamã na prem hkaga nê mẽ kot amnhĩ nhĩpêx tũm o ujanār prām xāj tanhmã mẽ homnuj to ho pa. Jakamã nhũm kagà nhĩpêx xwÿnhja tanhmã ja hã mẽ kām kapêr to.

Nê na pre tanhmã Tĩrtũm nhōrkwÿ kaàkre hã kagà hto. Nê kaxkwa kamã ōrkwÿ mexja nhũm tanhmã hã kagà hto nê mex o ōrkwÿ kaàkre jakrenh ã harê.

Nê mẽ kot Jejus ã amnhĩ xà htÿx kamã hamak o pa htã mẽ kot tee ri ja hã amnhĩ pumunh nê Jejus kaga nê mẽ hkurê kamã hihtÿx nê. ã mēhōja mẽ kām kapêr anê nê hã kagà nê mẽ hwÿr kumê. Nê mẽ kām kapêr o:

¹ Pa Kris kôt ixkwÿjaja? Xà mẽ amex? E ot pa mẽ amã kagà nhĩpêx nê mẽ awÿr kumê. Amnepēm Tĩrtũm na pre mẽ panhīgētjê hwÿr ÿ hã kapêr jarēnh o ri mẽ pa xwÿnhjê rē nhũm mẽ xatã

mê kãm kapêr jarênh o ri mê hkôt pa. Ahpÿnhã tanhmã mê kãm kapêr to ho amnhĩrît o mê hkôt pa. Nhũm Tĩrtũm xatã mê hkanrêhã mê hkra nê mê htãmnhwÿjê hwÿr mê hkwÿjê rê nhũm mê kãm kapêr jarênh o ri mê hkôt pa. Nom mê kãm kapêr piitã harênh kurê kumrêx kêt nê. Na prem ãm hkwÿ pix jarê. Tã nhũm hpãnhã mê hkwÿjaja wantajê mÿr pê mê hwÿr mra nê axte mê kãm hkwÿ jarênh o ri pa. Jao ra mê kãm harênh jatur xàm mênh o mō. ²⁻³ Tã nhũm Tĩrtũm Kraja mê pahwÿr wrÿ nê mê pamã kapêr jarênh jatur xàm kumê. Kêp Tĩrtũm Kra jakamã te kot amnhĩ nhĩpêx pyrã nê pa. Uràk nê mex o mex. Nê wa hihtÿx xàja tipxi. Nê wa àhpumunh tÿxja mãânên tipxi. Jakamã mê pahte pano ho Tĩrtũm pumunh kêt tã Jejus pumunh pê te mê pahte Tĩrtũm pumunh pyrãk. Uràk nê kot amnhĩ to rax o mê pahpiitã mê pajakrenh par. Amnepê m kormã mẽmoj kêt ri nhũm Jejus Tĩrtũm kukwak ri mẽmoj piitã ho kator pa. Tã koja Tĩrtũm nhÿrmã kãm mẽmoj piitã ôr pa. Kaxkwa kamã mẽmoj piitã nê jar pika piitã hkôt nhũm kãm piitã ôr pa.

Nê Jejus xàhpumunh xà pix kukwak ri na mẽmoja arĩ rãhãã. Na pre mê panê mê pahte amnhĩ tom-nuj piitã hpãnhã amnhĩrer par kaxyw mê panê ty. Hãmri akupÿm htĩr hãmri nê ma akupÿm kaxkwa hwÿr api. Tĩrtũm xihtÿx o hihtÿx xwÿnhja wÿr akupÿm api. Nê ô krĩ kamã upôk rũm pahĩ maati hkrĩ xà hã kuri hkrĩ ho hkrĩ. Nê ìhkô hã mê pahto amnhĩptàr rãhã ho hkrĩ.

Jejus mê Tĩrtũm kapêr o mê wrÿk xwÿnhjê jarênh

4-5 Nê Jesus kot amnhĩ to rax o Tĩrtũm kapêr o mẽ wryk xwỳnhjê jakrenh jakamã na pre ã Tĩrtũm kãm kapêr anê nê kãm:

Na ka amnhĩ to rax o mẽ kot ixkapêr o mẽ wryk xwỳnhjê jakre.

Mẽ kot inhmã tanhmã amnhĩ nhĩpêx to ho mẽ pa xwỳnh na mẽ.

No mẽ kurom apê Ixkra kumrêx jakamã amex o ate mẽmoj piitã hakrenh par.

Nê apê pika nhõ xwỳnhjê hwỳr ixte amênh mã xwỳnh na ka. Nà apê Ixkra kumrêx.

Kot paj jarãhã ixpê anhĩpêêxà hã mẽ piitã mẽ kãm amnhĩ to amnhĩrĩt. Pa na ixpê anhĩpêêxà.

Anhỹr o Kra Jesus mã kapêr. Na pre kapêr o mẽ wryk xwỳnhjê mã ã kapêr anhỹr kêt nê. Jesus mã pix mã ã kapêr anê.

6 Nê koja nhỹrmã akupỹn mẽ pahwỳr Kra mênh kaxyw hãmri nê kapêr o mẽ wryk xwỳnhjê mã kãm: E ota Ixkrata. Ixkra kumrêx na. Kot amnhĩ to rax o mẽ piitã mẽ hakrenh par.

Jakamã kêr ka mẽ apiitã kutã arôrôk nê kãm mex o mex ã harê.

Anhỹr o mẽ kãm kapêr. 7 Nê kapêr o mẽ wryk xwỳnhjê na pre axtem tanhmã mẽ harênh to nê mẽ harênh o:

Ixkapêr o mẽ wryk xwỳnhjaja na pa hte nhỹhỹm mẽ kurê nhũm htem inhmar xà hkôt ma nhỹhỹm mra nê inhmã tanhmã amnhĩ nhĩpêx to.

Te ixte ma nhỹhỹm kôk nê kuwyja mênh nhũm ixkapêr kôt nhỹhỹm môrja pyrak.

Anhÿr o mẽ harê. ⁸ No ã Krata jarênh anhÿr kêt nê. Na pre tanhmã kãm kapêr to nê amnhĩ pyrà nê kêp Tĩrtũm ã harê nê kãm:

Pa Tĩrtũm? E ka kot kaj mẽ ho amnhĩptàr rãhã ho akrĩ. Nê akatàt kôt mẽ ho amnhĩptà.

⁹ Koja mẽ tãm amnhĩ nhĩpêx ka ja hã mẽ omu nhũm ja amã mex nê.

No koja mẽ tanhmã amnhĩ tomnuj to ka ja hã mẽ omu nhũm ja apê omnuj nê. Mẽ kot tanhmã amnhĩ tomnuj to ho paja na omnuj tÿx.

Tã ate inhmã hprãm xà hkôt amnhĩ nhĩpêx jakamã na pa mẽ kaxyw axãm ka akĩnh kãm mẽ ho amnhĩptà.

Ixpê anhõ Tĩrtũm na pa ã amã ixkapêr anê. Anê.

¹⁰ Hãmri nê kãm:

Pa Pahihti. Nà amnepêm kormã mẽmoj kêt ri na ka pre ixkukwak ri pika nê kaxkwa ho akato. ãm hãmri na ka pre ã amnhĩ nhĩpêx anê.

¹¹ Tã nom koja nhÿrmã hamẽ wa hapêx pa. ãm kaxipix kot kaj kurom arĩ arãhãã nê aa ajapêx kêt nê.

Kaxkwa nê pika koja wa nhÿrmã te ixkre hã pô htũm kot amnhĩ nhĩpêx pyràk.

¹² Kot kaj wa hipêx o te mẽ kot ixkre nê pô htũm mã hikranh par nê hpãnhã hã nyw janhôr pyràk.

Jao pika nê kaxkwa htũm o ajapêx pa nê hpãnhã nyw nhĩpêx. Kaxkwa nyw nhĩpêx nê pika nyw nhĩpêx.

Nom kot kaj pika nê kaxkwa tũmta pyrà nê aa awej nê axirerek kêt nê.

Kot kaj arĩ anyw nê axihtỳx rãhã apa ho apa nê aa
ajapêx kêt nê. Arãhã atĩr tũm nê apa ho apa
xwỳnh na ka.

¹³ E jar inhĩhkô hã nhỹ nê inhmã mẽ ho amnhĩptàr
o akrĩ.

Kot paj mẽ kãm akurê xwỳnhjê pynênh pa nê man
awỳr mẽ o mra nê anhĩhkram mẽ haxàr pa.
Anê.

Ã na pre Tĩrtũmja Kra Jejus mã kapêr anê. No kapêr
o mẽ wrỳk xwỳnhjê mã ã kapêr anhỹr kêt nê.

¹⁴ E kot paj hpãnhã ixprĩ hã mẽ amã Tĩrtũm kapêr
o mẽ wrỳk xwỳnhjê jarê ka mẽ inhma. Tĩrtũm mã
na htem tanhmã amnhĩ nhĩpêx to ho pa. Na hte
nhỹrmã kuri mẽ htĩr tũm nê mẽ pa mã xwỳnhjê
hwỳr mẽ kurê nhũm mẽ ma mẽ hwỳr wrỳ nê
tanhmã mẽ ho ajuta hto ho pa. Na htem ã amnhĩ
nhĩpêx anhỹr o pa.

2

Mẽ pahte Jejus kaga hkêt ã mẽ pamã karõ

¹ Tã ã Tĩrtũmja Kra kot amnhĩ to rax o kapêr o mẽ
wrỳk xwỳnhjê jakrenh ã harênh kot anhỹr jakamã
kwa kêr pu mẽ kapêr mar tỳx rãhã nê hkôt pix
mã amnhĩ nhĩpêx o papa. Kot pu mẽ ho anhỹr
kêt hãmri nê gaa nê hkaga. ² Na pre Tĩrtũm kapêr
o mẽ wrỳk xwỳnhjaja amnepê mã mẽ panhĩgêjtê
hwỳr wrỳ nê Tĩrtũm nhỹ hã mẽ kot tanhmã amnhĩ
nhĩpêx to ho pa hã mẽ kãm karõ nê ma akupỳm
api. Nê katàt kôt ri mẽ kãm Tĩrtũm kapêr jarênh o
pa. Hãmri nhũm mẽ kot hkôt amnhĩ nhĩpêx nê mar
mex xwỳnhjaja nhũm mẽmoj mẽ kãm mex nê. No
nhũm mẽ kot mar nê ãm mar xwỳnhjaja koja mẽmoj
mẽ kêp omnuj nê. ³ Koja nhỹrmã mẽmoj mẽ kêp

omnuj tỳx kumrêx nhũm mẽ tee ri amnhĩ tã omu nẽ tee ri kêp amnhĩptâr prãm kaprỳ nẽ mex kêt nẽ pa. Nom mẽ kot Tĩrtũm kapêr mar tỳx xwỳnhjaja koja mẽmoj mẽ kãm mex o mex. Koja Tĩrtũm amnhĩ katut kôt mẽ kot amnhĩ tomnuj rẽn pa nẽ axte kãm hamaxpêr kêt nhũm mẽ kuri htĩr tũm nẽ mex rãhã nẽ pa ho pa. Na pre Pahihti Jejus mẽ kot kapêr mar o kuhê xwỳnhjê kumrêx mã ã ja jarẽn anẽ nẽ mẽ kãm:

—Nà kot kaj mẽ amnhĩ kaxyw inhmã ajamaxpêr nhũm Tĩrtũm ixtã mẽ apumu nẽ mẽ anê mẽ ate amnhĩ tomnuj piitã ho hapêx pa nẽ axte kãm hamaxpêr kêt nẽ. Anẽ.

Hãmri nhũm mẽ kot kapêr mar nẽ hkôt mẽ pa ho mẽ pa nẽ xwỳnhjaja mar tỳx nẽ amnhĩ xô ri mẽ pamã harẽn o ri pa. Nẽ mẽ pamã:

—Nà ãm hãmri. Nà ã ja jarẽn kot anhỹr. Anẽ.

⁴ Hãmri nẽ mẽ pamã aa mẽ pahte mẽmoj pumunh kêt kwỳ ho anhỹr o ri mẽ pahkôt pa. Tĩrtũm Karõ kot ja kaxyw mẽ ho mẽ àhpumunh tỳx jakamã nhũm mẽ ỹ hã ahpỹnhã tanhmã mẽ pamã amnhĩ nhĩpêx to ho pa. Mẽ pahte ja hã mẽ omunh nẽ kamã pano pyma kaxyw. Nẽ ã mẽ pajamaxpêr anẽ nẽ pajamaxpêr o:

—Nà ãm hãmri na mẽ pamã ã Jejus jarẽn anẽ nẽ ỹ hã ã amnhĩ nhĩpêx anhỹr o pa.

Anhỹr o pajamaxpêr kaxyw na prem ã mẽ pahkôt amnhĩ nhĩpêx anhỹr o pa.

*Mẽ pahpê Jejus tō nẽ htōx ã mẽ pajarẽn
Juãw 1.14; Rõmãn 8.3-4; Piripos 2.5-11; Korosẽ
2.9; Wam Juãw 4.2*

⁵ Nê na pre Tîrtûm amnhî kukamã tanhmã amnhî jarênh to nê nhÿrmã kot akupÿm mẽmoj piitã ho nyw nê tãm mẽmoj piitã ho amnhîptâr o pa hã amnhîjarê. No na pre kapêr o mẽ wrÿk xwÿnhjê mã ã mẽ kot amnhî nhîpêx anhÿr ã mẽ kãm karô hkêtnê. Koja jajaja mẽ pahto amnhîptâr o pa hkêtnê. ⁶ Tîrtûm kapêr ã kagà htûm kot ja jarênh kot:

Kwa Tîrtûm. Nà ãm hãmri na ka hte pika ja kamã ri mẽ ixpa xwÿnhjê jamâr mex rãhã ho apa. Akĩnhã amarĩ ri mẽ ixpa xwÿnh tã amã mẽ ijapêê. Nê mẽ ixkutã anojarêtrãhã ho apa.

⁷ Na ka hte tanhmã mẽ inhîpêx to pa mẽ te mẽ ixpê akapêr o mẽ wrÿk xwÿnhjê pyrâk. Jao mẽ urâk nê akukwak ri mẽ inhmex nê ixpa ho ixpa.

Mẽ urân mẽ ixàhpumunh nê ixihitÿx kêt tã mẽ inhmex nê ixpa.

⁸ Na ka pre ra ate mẽmoj to akator xwÿnh piitã mẽ inhîhkram haxà.

Nà ãm hãmri na ka pre ã mẽ inhîpêx anê Tîrtûm. Amex o amex. Anê.

Na pre ra mẽmoj piitã mẽ panhîhkram haxà. Pika nê kaxkwa nê kapêr o mẽ wrÿk xwÿnhjaja nê mẽkarõmnuti nê kot mẽmoj piitã hipêxja nhûm mẽ panhîhkram haxâr pa. Mẽ pahte îhkô hã ho amnhîptâr o papa kaxyw. No na pu mẽ kormã piitã ho amnhîptâr kêt nê. ⁹ No kêt Jesusja na Tîrtûm mẽ pakurom îhkram mẽmoj piitã haxâr par kumrêx. Kormã pika ja kamã ri pare ri na pre tanhmã amnhî nhîpêx to nê Tîrtûm kapêr o mẽ wrÿk xwÿnhjê hkĩnhã te amnhî to grire pyrâ nê amnhî xà htÿx kamã hamak kãm ty. Tîrtûm kãm mẽ pahto mex prãm xàj ã mẽ pahpiitã mẽ panê

htyk anê. Tã nhũm Tĩrtũm akupỹm ho htĩr nê akupỹm amnhĩ wỳr ho api nê kêp Pahi Maati mex o mex ã harê. Na pre ã Jejusja mẽ panê amnhĩ nhĩpêx anê nhũm Tĩrtũm ja hã omu nê kukwak ri mẽ pahto mex nê.

¹⁰ Nê Tĩrtũm kot mẽmoj piitã ho kator jakamã mẽmoj piitã ò na. Na pre mẽ pakukamã hamaxpêr o:

—Inhmã ixkra xohtô hprãm. Kot paj nhỹrmã man amnhĩ wỳr mẽ ho api kê mẽ ixri mex rãhã nê pa ho pa. Nà kot paj ã mẽ hipêx anê. Nê Ixkra Jejus koja kêp mẽ ò Pahihti. Koja mẽ uràk nê mẽmoj punuj pumunh o pa hãmri nê à htỳx kamã hamak o kêp mẽ ò Pahihti mã tãm. Anê.

¹¹ Na hte Jejus mẽ panê mẽ pahte amnhĩ tom-nuj rê nê hpãnhã mẽ pamã mẽ pahte amnhĩ nhĩpêx nyw jagjê nhũm Tĩrtũm ja hã mẽ pah-pumunh kôt mẽ pahto hkra. Kêp Jejus Nhĩpêêxà nê kêp Mẽpanhĩpêêxà maati jakamã nhũm Jejusja mẽ pahpê htõ nê mẽ pahpê htõx ã mẽ pajarê nê mẽ panhỹ hã hkĩnh nê.

¹² Tĩrtũm kapêr ã kagà htũm ã mẽ pajarênh kot anhỹr. Kamã Jejusja Mẽpanhĩpêêxà maati mã mẽ pajarênh kot:

Koja ixtõ nê ixtõxjaja akapêr mar kaxyw axpên wỳr akuprõ pa ma mẽ hkôt mra nê mẽ kãm akapêr jarê nê mẽ ãhkô hã amex ã gre. Anê.

¹³ Hãmri nê kãm:

Kot paj amnhĩ kaxyw akôt pix mã ijamaxpêr mex o ri ixpa. Anê.

Hãmri nê hpãnhã kãm:

Ot pa akrajê hkôt ri ixpa ho ixpa.

Ka na ka pre mẽ kêp ixtõ nẽ ixtõx kaxyw inhmã mẽ agõ.

Koja mẽ ixpyrà nẽ amnhĩ kaxyw amã hamaxpêr rãhã ho pa Tĩrtũm. Anẽ.

¹⁴ Nẽ mẽ pahpê pika nhõ xwỳnhjaja na pu htem ãm ri panhĩ pix ã papa. Nẽ panhĩ kamã pahkamrô hã ri papa. Jakamã na pre Jejus kot mẽ panê htyk kaxyw mẽ pahwỳr wrỳ nẽ mẽ pahpyrà nẽ ã ho mẽ pakamã kato. Tã mẽmo kaxyw na pre ã ho ã nẽ mẽ pahkôt pa? Nà ã ho htyk o Satanasti pê hihtỳx xà ho hapêx par kaxyw na pre ã amnhĩ nhĩpêx anẽ. Satanasti kêp mẽ kot amnhĩ tomnuj xwỳnhjê hpãm nẽ kêp mẽ htyk xwỳnhjê hpãm. ¹⁵ Jakamã na hte kot mẽ pahtã ãhkra pikamỳr pyràk o mẽ panhĩpêx pu mẽ ã hã pamã pahtyk pyma nẽ ri papa. Tã ra Jejus kot mẽ pahwỳr wrỳk nẽ te kêp mẽ papytãr pyràk o mẽ panhĩpêx jakamã pu mẽ tee ri pahtyk kukamã pajamaxpêr o ri pamã ma ho papa hkêt nẽ.

¹⁶ Nẽ Tĩrtũm kapêr o mẽ wrỳk xwỳnhjê ho mex kaxyw na pre Jejus pika hwỳr wrỳk kêt nẽ. Mẽ panhĩgêt finat Apraãw pyrà nẽ mẽ panhĩ ho panhĩ xwỳnhjê ho mex kaxyw na pre wrỳ. ¹⁷ Ijaew nhõ patrejaja na pre htem mẽ kot amnhĩ tomnuj mỳrapê mẽ hpãnhã Tĩrtũm mã mry hkwỳ pa nẽ hkamrô kapĩ nẽ mẽ ho Tĩrtũm wỳ. Kot hã mẽ omunh nẽ mẽ mex ã mẽ harênh kaxyw. Tã nhũm Jejus wrỳ nẽ mẽmo mryta pyrà nẽ ã mẽ panê hkamrô pikapĩr anẽ. Kaxyw na pre mẽ pahtõ maatija mẽ pahwỳr ã ho ã nẽ wrỳ nẽ mẽ pahpyrà nẽ ni nhõhy rũm kato. Jao kêp mẽ pahto Tĩrtũm wỳr xwỳnh maati. Na pre Tĩrtũm kãm hprãm xà hkôt mẽ panê mẽ pahte amnhĩ tomnuj pãnhã amnhĩrer

pa. Tã kot mẽ pahpyrà nẽ mẽmoj punuj pumunh nẽ amnhĩ xà htỳx kamã hamak o pa jakamã kệp mẽ pakamã ukaprĩ xwỳnh ã pixi mex na. ¹⁸ Kormã htyk kêt ri na pre mẽ pahpyrà nẽ omnuj nẽ ri pa. Nhũm mẽkarõmnuti nhõ pahi kot tanhmã amnhĩ tomnuj to hprãm xà tee ri hkôt kãm ahkrox o pa hkaprỳ nhũm hkôt amnhĩ nhĩpêx kêt nẽ amnhĩ nẽ ho axtem nẽ. Jakamã koja Satanastija uràk nẽ tanhmã mẽ panhĩpêx to nhũm Jejus mẽ pahtã omu nẽ amnhĩ pyrà nẽ tanhmã kệp mẽ panhĩpêx to pu mẽ ỹ hã kutã amnhĩ to htỳx nẽ papa.

3

Jejus kot amnhĩ to rax o Mojes jakrenh ã harẽnh Juãw 1.17-18

¹ E ixkrãmnhwỳjaja. Ra Tĩrtũm kot mẽ pahte kapêr mar nẽ tãm amnhĩ nhĩpêx o ri papa kaxyw mẽ pahto hkra jakamã kwa kêr ka mẽ Jejus kot tanhmã mẽ pamã amnhĩ nhĩpêx toja mã ajamaxpêr rãhã ho ri apa. Na pre Tĩrtũm mẽ pahwỳr kumẽ nhũm mẽ pahwỳr wrỳ nẽ Tĩrtũm kapêr o mẽ pajahkre ho ri mẽ pahkôt pa. Nẽ te kệp mẽ panhõ patre pyrà nẽ mẽ pahto Tĩrtũm wỳr o pa. ² Na pre Tĩrtũm finat Mojes kwỳ kaxyw Mojesja xãm nhũm kãm hprãm xà hkôt tanhmã mẽ hipêx to ho pa. Tã nhũm hpãnhã mẽ pakaxyw Kra Jejusja xãm nhũm Mojes pyrà nẽ Tĩrtũm kãm hprãm xà hkôt pix mã tanhmã mẽ panhĩpêx to ho pa. Hamẽ na pre wa Tĩrtũm jamaxpêr xà hkôt tanhmã kãm mẽ panhĩpêx to ho pa.

³ Koja mẽhõ amnhĩm ixkre mex nhĩpêx nẽ hipêx pa nhũm hkwyjaja hwỳr mra nẽ omu nẽ mex

kumrêx ã harê. Nom kot hipêx xwỳnh̃ta àhpumunh xà hkôt hipêx jakamã tãm na mex o kot ixkreতা jakrenh. Ja pyrà nê finat Mojes kot amnhĩ to rax tã nhũm Jejus kot amnhĩ to rax o kot hakrenh. Mojes te kêp ixkre nhĩpêx̃ta pyràk no Jejus te kêp ixkre nhĩpêx xwỳnh̃ta pyràk jakamã kot amnhĩ to rax o kot Mojes jakrenh.

⁴ Nê mẽ kot ahpỳnhã amnhĩ krã hkôt tanhmã ixkre nhĩpêx to jakamã kot hipêx xwỳnh̃ta na mex o ixkreতা jakrenh. Tã ja pyrà nê Tĩrtũm kot mẽmoj piitã ho kator jakamã kot amnhĩ to rax o kot mẽmoj piitã ho kator xwỳnh̃ jakrenh par.

⁵ Nê finat Mojes na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nê ma kãm hkwyjê piitã hkôt mẽ kãm kapêr jarênh o ri pa. Tĩrtũm tanhmã kot mẽ kãm kapêr tota kukamã nhũm mẽ kãm harênh o mẽ hkôt pa. No ãm Tĩrtũm mã tanhmã amnhĩ nhĩpêx to ho hpa xwỳnh̃ pix na pre.

⁶ Nê Kris haxwỳja na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nom Mojes rom kêp Tĩrtũm Kra kumrêx jakamã kurom kêp mẽ panhõ Pahihti kumrêx. Tã kwa kêr pu mẽ kãm hprãm xà hkôt pix mã tanhmã kãm amnhĩ nhĩpêx to ho ri papa. Mẽ kot hã tanhmã mẽ panhĩpêx to htã pu mẽ ỹ hã mẽ kutã amnhĩ to htỳx nê papa nê pajamaxpêr o:

—Nà ixpunuj nê ixpa htã kot paj ixpunuj rãhã ixpa ho ixpa hkêt nê. Kojã nhỹrmã Tĩrtũm ixto mex kumrêx pa axte tanhmã ixpunuj to nê ixpa hkêt nê. Hêx̃ta waa nê. Nà ja inhmã hprãm tỳx kumrêx.

Anhỹr o amnhĩ kukamã pajamaxpêr o papa.

*Mê pahte Tîrtûm kaga hkêť ã mê pamã karõ
Wam Korît 10.1-11; Jutre 5*

7-8 Amnepêť na pre mẽhõja tanhmã Tîrtûm Karõ
nhỹ hã kapêť to nê kapêť o:

E kêť ka mẽ Tîrtûm kapêť mar tỳx o apa.

No ama nê ãm ama nê ri hã apa hkêť nê. Rỳ kapêť
pê akrã hihtỳx o apa hkêť nê.

Mê akukamã mẽ anhĩgêťjaja na prem ã amnhĩ
nhĩpêx anê nê Tîrtûm kapêť pê hkrã hihtỳx
o pa. Kapôt ã Mojes kôt mẽ pata ã na prem
kãm Tîrtûm kapêť mar prãm kêt nê. Nê tee
ri amnhĩ kukamã hamaxpêť nê akupỹm Ejit
wỳr hkrã nê axpêť mã: “Kwa na pu mẽ ra
pahpunuj tỳx nê papa nhũm Tîrtûm ãm ja
hã mẽ pahpumu nê tanhmã mẽ pahto mex
to hkêť nê. Mãn ra mẽ pahkaga nà? E kwa
pu mẽ awjanã nê ma akupỹm Ejit wỳr mãn
papa.” Anê.

9-10 Na prem ã axpêť mã kapêť anhỹr o ri pa hã
amgrà pê 40.

Tîrtûm xatã kot tanhmã mẽ ho mex to nhũm mẽ
kot amnhĩ tã omunh tã ãm omu nê htỳx ri
amnhĩ hkrã hkôt pa.

Nhũm tee ri amnhĩ tã mẽ omu nê mẽ kamã gryk
nê.

Hãmri nê hamaxpêť o: “Nà pêť mẽ hamaxpêť kot
mê hã hkwỳ jêť kêt kumrêx. Te mẽ hamak
kre hkêť pyrã nê ixkapêť mar kêt nê.” Anhỹr
o hamaxpêť.

11 Hãmri nê mẽ kãm: “E mẽ inhma. ã mẽ ate amnhĩ
nhĩpêx anhỹrja mỳrapêť kot kaj mẽ ma ixte
mê amã pika mex nhõr mã xwỳnhta wỳr apa
hkêť nê.” Anhỹr o mẽ kãm kapêť. Anê.

Ã mēhōja Tīrtūm Karō nhỹ hã te Tīrtūm tãm kot mē kãm kapēr pyrāk o mē harēnh anē. ¹² Jakamã kwa mē okora ixkràmnhwỳjaja. Kêr ka mē amnhĩ to mex o apa. Tīrtūm kêp Mēpahpãm ã pixi mex tã kot kaj mē tanhmã ajamaxpēr punuj to rỳ amnhĩ kaxyw hkôt ajamaxpēr kêt hãmri nē te ate amnhĩ katut kôt ãm pyrāk o hipêx nē hkaga. Kwa mē ã amnhĩ nhĩpêx anhỹr kêt nē. ¹³ Kêt mē Kris kôt axpên to axihtỳx o ri apa. Nē apkati mē ã axpên nhĩpêx anhỹr rãhã nē. Kot kaj mē anhỹr kêt hãmri nē mē amã Tīrtūm kapēr mar prãm kêt ã amnhĩ to amnhĩrīt. Jao tanhmã amnhĩ tomnuj to ho ri apa nē atỳx ajamaxpēr o: —Nà ixte ã amnhĩ tomnuj anhỹr tã nhũm Tīrtūm ja hã ixpumu nē ãm hã ixpumu.

Anhỹr o ajamaxpēr japêr. Rỳ mē ajamaxpēr o:

—Nà na pa hte ã amnhĩ tomnuj anē nhũm Tīrtūm ja hã ixpumu nhũm ja kãm mex nē.

Anhỹr o ajamaxpēr japêr. ¹⁴ Kwa mē ri ã ajamaxpēr anhỹr kêt nē. Amnepê mã mē pahte Kris kôt amnhĩ xunhwỳr nhũm kot mē pahto hkrata ã na pu prem amnhĩ kaxyw hkôt pajamaxpēr o papa. Tã kêr pu mē arĩ ã amnhĩ nhĩpêx anhỹr tỳx o papa rãhã ty. ¹⁵ Tīrtūm kapēr ã kagà htũm kot ja jarēnh kot:

E kêr ka mē Tīrtūm kapēr ma nē mar tỳx nē.

No ama nē ãm mar nē ri hã apa hkêt nē.

Rỳ mē kot hkaga xwỳnhjê pyrà nē kêp akrã hihtỳx kêt nē. Anē.

¹⁶ Mē panhĩgêtjaja na prem Mojes kôt pika pê Ejit rũm kato nē hkĩnh nē ma kapôt ã kormã pika mex wỳr pa. Nom Tīrtūm kapēr mar nē hkôt amnhĩ nhĩpêx rãhã hkêt nē. Na prem kuma nē hkôt

amnhĩ nhĩpêx o hã apkati grêre htã ra mẽmoj nhỹ hã omnuj nẽ pa hã amnhĩ pumu nẽ tee ri amnhĩ kukamã hamaxpêr. ¹⁷ Jao xatã kapêr nhĩrôp kuhê nẽ amnhĩ hkrã hkôt pix mã amnhĩ nhĩpêx o pa ho ra hã amgrà pê 40. Hãmri nhũm tee ri amnhĩ tã mẽ omu nhũm ja kêp omnuj nẽ. Jakamã nhũm mẽ piitã kapôt ã ri pa nẽ gaa nẽ pikaprâr pa. ¹⁸ Mẽ kot kapêr mar kêt jakamã nhũm mẽ kãm:

—Nà ã mẽ ate amnhĩ nhĩpêx anhỹr o ri apaja mỳrapê kot kaj mẽ ixte mẽ amã mẽ amex nhõr mã xwỳnhta wỳr apa hkêt nẽ. Anẽ.

¹⁹ Tã mẽ kot amnhĩ kaxyw Tĩrtũm kôt hamaxpêr o pa hkêt jakamã na prem pika mexta wỳr hpôx kêt rãhã pikaprâr pa. Nhũm mẽ hkra nẽ mẽ htàmnhwỳjê pixjaja na prem mẽ mỳr pê hwỳr pøj nẽ kamã pa.

4

Mẽ pahte Tĩrtũm kukwak ri pajamakêtkati nẽ ri papa hã mẽ pajarênh

¹ Mẽ pahte Tĩrtũm kukwak ri pajamakêtkati nẽ ri papa ho papaja Tĩrtũm kãm hprãm jakamã kwa kêr pu mẽ amnhĩ pumunh mex o papa. Nẽ wam mẽ panhĩgêt rom Tĩrtũm kapêr mar tỳx nẽ hkôt măn kêt ri amnhĩ nhĩpêx mex rãhã nẽ. Kêr pu mẽ kurom mẽ pajamak kãm amnhĩ krit xà hã pika mexta wỳr pøj. ² Mẽ kot mẽ pahpyrà nẽ Tĩrtũm kapêr mar mex tã na htem amnhĩ kaxyw hkôt hamaxpêr kêt nẽ. Te mẽ kot mar kêt pyrāk. ³ ãm mẽ kot amnhĩ kaxyw Kris mã hamaxpêr xwỳnh pixjaja na htem kukwak ri hamakêtkati nẽ ri pa ho pa. Amnepê mã mẽmoj piitã hkêt ri na pre Tĩrtũm

měmoj piitã ho kator pa hãmri nhũm apkati nhũm axte mẽmoj tã àpênh kêt nê. ãm õ krĩ kamã arĩ hamakêtkati nê hkôkôt o hkrĩ. Tã mẽ pahte uràk nê pajamakêtkati nê papa ho papaja na kãm hprãm. No wam ri mẽ pa xwýnhjaja mẽ kot amnhĩ tomnuj mýrapê na pre Tĩrtũm mẽ kot urà nê hamakêtkati nê paja nê mẽ hkurê. Kapêr ã kagà htũm kot harênh kot:

Na pre Tĩrtũm tee ri amnhĩ tã mẽ kot hipêx ã mẽ omu nhũm ja kêp omnuj nê. Hãmri nhũm mẽ kãm: “Nà kot kaj mẽ ixkukwak ri axàmnhĩx ajamakêtkati nê apa hkêt nê.” Anê.

⁴ Nê kot harênh kot:

Na pre Tĩrtũm àpênh ã arĩgro kêp 6 hãmri nhũm arĩgro pê 7ta ã nhũm axte mẽmoj tã àpênh kêt nê. Na pre arĩ hkôkôt o nhỹ.

Arĩgro pê 7 ã arĩ hamakêtkati nê hkôkôt o nhỹ. Anê.

⁵ Nê mẽ kot kapêr mar nê ãm mar xwýnhjê jarênh kot:

Kot kaj mẽ aa ixkukwak ri axàmnhĩx nê ajamakêtkati nê apa hkêt nê. Anê.

⁶ Mẽ panhĩgêjtaja kot amnhĩ kaxyw Tĩrtũm kôt hamaxpêr kêt jakamã na prem hamakêtkati nê ri pa hkêt nê. Tã mẽ papajaja na Tĩrtũm arĩ kãm mẽ paxàmnhĩx nê pajamakêtkati nê papa hprãm.

⁷ Amnepêm Ijaew Tĩrtũm kôt hamaxpêr kêt jakamã na prem kapôt ã pikaprâr pa. Hãmri nhũm amgrà xohtô nê hapêx nhũm Tĩrtũm mẽ hkanrêhã mẽ htàmnhwýjê hõ pê finat Tawija mã kapêr nhũm kuma nê mẽ pamã tanhmã kapêr tota ã kagà nê hã kagà kot:

Kwa kêr ka ixkapêr ma nê mar tỳx nê.

No mẽ anhiġetjê pyrà nê akrã hihtỳx ho inhma nê
ãm inhmar kêt nê. Anê.

Na pa pre ra mẽ amã ã ja jarênh anê. ⁸ Na pre
finat Jojueja finat Mojes mỳr pê ma pika pê Kanaã
hwỳr mẽ hkanrêhã mẽ hkrajê o pa nê hwỳr mẽ o
pôj. Tã nhũm prem Jojue kukwak ri hamakêtkati
nê pa ho pa hkêt nê. Kêp ãm kukwak ri ã amnhĩ
nhĩpêx anhỳr ronhỳx Tĩrtũm axte mẽ kãm mẽ
hamakêtkati nê mẽ hamak kãm amnhĩ krit nê mẽ
pata hkukamã harênh kêt nê. ⁹ Nom mẽ pahte
kukwak ri pajamakêtkati nê pajamak kãm amnhĩ
krit nê ri papa ho papaja na Tĩrtũm arĩ kãm hprãm.
¹⁰ Na pre arĩgro pê 6ja ã mẽmoj piitã ho kator
pa nhũm apkati nhũm hamakêtkati nê hkôkôt o
nhỹ. Tã kot puj mẽ pahpê hkrajaja amnhĩ to kuwỳ
nhũm tanhmã mẽ pahkrã hto pu mẽ kukwak ri
uràk nê paxàmnhĩx nê pajamakêtkati nê papa ho
papa. Te Tĩrtũm àpênh pa nhũm apkati nhũm
hamakêtkati nê hkôkôt o ỳrta pyràk. ¹¹ Jakamã kwa
kêr pu mẽ amnhĩ to kuwỳ kê ã mẽ panhĩpêx anê pu
mẽ uràk nê ã amnhĩ nhĩpêx anhỳr rãhã ho papa.
Nom kot pu mẽ pahkwỳ Ijaewjê pyrà nê kapêr
kwỳm amnhĩ nhĩpêx o papa hãmri nê mẽ urà nê
paxàmnhĩx pajamakêtkati nê papa hkêt nê.

Tĩrtũm kapêr te kot wapo xwa gix pyràk ã harênh

¹² Nê Tĩrtũm kapêrja te ã ho tanhmã kot mẽmoj to
kaxyw hihtỳx pyràk. Nê te wapo xwa gix pyràk.
Koja mễhõ ô wapo xwa mex nê ho mẽmoj jakàr
mex nê. Ho mry hi jakàr mex pê kaxwỳnh kãm
hi kanhĩn o amnhĩrĩt. Ja pyrà nê na hte Tĩrtũm
kapêr mẽ pajamaxpêr o amnhĩrĩt nê mex ã harê rỳ
omnuj ã harê.

¹³ Nê na htem Tĩrtũm pê mẽmoj to pimxur kêt nê. Na hte hprĩ hã mẽmoj piitã omunh pa. Nê mẽ pajamaxpêr kôt mẽ pahpumunh pa. Na pu htem ã kot mẽmoj piitã omunh par anhỹr xwỹnhja noo mã tanhmã amnhĩ nhĩpêx to rãhã ho papa.

*Jejus kêp mẽ panhõ patre maati hã harênh
Eprêw 10.19-25; Wam Juãw 2.1-2*

¹⁴ Nê Ijaew nhõ patrejaja na pre htem Tĩrtũm mã amnhĩ jarênh xà hã ixkre hwỹr agjê nê kamã mẽ ho Tĩrtũm wỹr o pa. Ja pyrã nê na pre ra Jejus Tĩrtũm nhõ krĩ hwỹr api nê kamã mẽ pahto hwỹr o hkrĩ. Kêp Kra kumrêx jakamã kêp mẽ pahto Tĩrtũm wỹr xwỹnh maati. Jakamã kwa kêr pu mẽ amnhĩ kaxyw hkôt pajamaxpêr tỳx rãhã ho papa.

¹⁵ Satanasti na pre te kot mẽ panhĩpêx pyrãk o Jejus nhĩpêx. Nê tee ri kot tanhmã kãm kapêr to nhũm kot mar nê tanhmã amnhĩ tomnuj to hprãm xaj ãm ri kãm ahkrox kaprỹ nhũm kutã amnhĩ to htỳx nê hkôt amnhĩ nhĩpêx kêt nê. Tã kot Satanasti kot amnhĩ nhĩpêx ã omunh mex jakamã na hte kêp mẽ pahtãnopxar mex o pa. Kot mẽ paxirerek kôt mẽ pahpumunh mex. ¹⁶ Jakamã kwa kêr pu mẽ amnhĩ tã kamã pahpijaàm kêt kãm paxàmnhĩx ri amnhĩ to hwỹr o papa. Kêp mẽ pakutã nojarêt xwỹnh nê kêp mẽ pakamã ukaprĩ xwỹnh jakamã kêr pu mẽ tee ri mẽmoj tã amnhĩ pumu nê amnhĩ to hwỹr kurê kumrêx. Hãmri nê ỹ hã paxàmnhĩx nê pajamakêtkati nê ri papa.

5

¹ Nê mẽ panhõ patre maati Jejusja Tĩrtũm na pre mẽ pakaxyw ãm. Kêp mẽ pahkwỹ hã mẽ pakaxyw

ãm nhũm hte mẽ pahto Tĩrtũm wỳr o pa. Nẽ kãm mẽ pahkĩnh xà nhõr o pa. Kot ja hã mẽ pahpumunh nẽ mẽ pahte kapêr kwỳm tanhmã amnhĩ nhĩpêx to ho papa hã mẽ pakamã gryk o hapêx tokyx anhỹr kaxyw.

² Mẽ panhĩgêjtaja na pre htem mẽ õ patre maati hwỳr mra nẽ kãm tanhmã amnhĩ tomnuj to hã amnhĩ jarẽ nhũm mẽ kuma nẽ mẽ kamã ukapĩrĩ nẽ. Mẽ urà nẽ kormã kot Tĩrtũm kôt amnhĩ nhĩpêx totuj anhỹr jakamã na pre mẽ kot tanhmã amnhĩ jarẽnh toja ma nẽ mẽ kamã ukapĩrĩ nẽ. ³ Hãmri nẽ mẽ hpãnhã Tĩrtũm mã mẽmoj gõ nẽ mãânẽn amnhĩ pãnhã kãm mẽmoj gõ. Mẽ urak nẽ kot amnhĩ tomnuj o paja mỳrapê amnhĩ pãnhã kãm mẽmoj gõ. ⁴ No na pre hte patrejaja amnhĩ krã hkôt kêp patre maati kaxyw amnhĩ xunhwỳr kêt nẽ. Tĩrtũm kot mẽ kaxyw mẽ unhwỳr jakamã na pre mẽ kaxyw finat Arãwja xãm nhũm kêp mẽ õ patre maati hã mẽ ho Tĩrtũm wỳr o pa.

⁵ Nẽ Kris haxwỳja kêp mẽ panhõ pahi maati hã tãm kot amnhĩ xãm kêt. Tĩrtũm na pre mẽ pakaxyw ãm nẽ tanhmã kãm kapêr to nẽ kãm:

Nà apê Ixkra na ka.

Kot paj jarãhã ixpê Anhĩpêêxà hã mẽ kãm amnhĩ jarẽ. Anẽ.

⁶ Nẽ hpãnhã kãm:

Kot kaj Mekijetek pyrà nẽ apê patre maati hã mẽ ho ixwỳr rãhã ho ri apa. Anẽ.

⁷ Jesus kormã pika ja kamã pa ri na pre amnhĩ to Tĩrtũm wỳr rãhã ho pa. Tõhã hkapĩrĩ nẽ tee ri mẽmoj tã amnhĩ pumu nẽ amnhĩ to kuwỳ. Nẽ tee ri mẽ kot hpĩrta kukamã hamaxpêr nẽ mỳr

kãm amnhĩ to kuwỳ. Kop apu Tĩrtũm kãm mẽ kot kệp hpĩr prãm kêt ronhỹx pre tanhmã nê mẽ kãm hkurê xwỳnhjê ho nhũm mẽ hpĩr kêt nê. Jakamã nhũm pre ã amnhĩ to hwỳr anê. No ãm Tĩrtũm kãm prãm xà hkôt kãm amnhĩ nhĩpêx prãm jakamã nhũm kuma no ãm tanhmã nê mẽ ho hkêt nhũm prem kupĩ. ⁸ Kệp Tĩrtũm Kra kumrêx tã amnhĩ xà htỳx kãm hamak kãm ty. Jao Tĩrtũm kãm hprãm xà hkôt amnhĩ nhĩpêx ã amnhĩ pumunh mex nê. ⁹ Na pre amnhĩ xà htỳx kãm hamak o amnhĩ mex o amnhĩ mex ã mẽ kãm amnhĩ to amnhĩrĩt. Jakamã na hte mẽ kot kapêr kôt ri amnhĩ nhĩpêx o mẽ pa xwỳnhjê mã mẽ kot amnhĩ nhĩpêx nyw jagjê nê nhỹrmã Tĩrtũm mẽ wa kuri mẽ htĩr tũm nê mẽ pa mã xwỳnhjê hã mẽ harê. ¹⁰ Jakamã na pre Tĩrtũm Mekijetek pyrã nê kệp patre maati kaxyw ãm.

Mê pahte Kris kaga nê mẽ pahkurê

Wam Korĩt 3.1-2, 13.11, 14.20; Epes 4.11-16

¹¹ Nê Jejus kệp mẽ pahto Tĩrtũm wỳr xwỳnh maati hã harênhja inhmã ixprĩ hã mẽ amã harênh par prãm tã ka mẽ kormã inhmar tỳx kêt nê. Pa tee ri ixprĩ hã mẽ amã harênh kaprỳ. Te mẽ amã mar prãm kêt o amõr pyræk. ¹² Amnepê mã mẽ ate Kris kôt amnhĩ xunhwỳr nê kapêr mar tỳx tã kormã nhãm amnhĩ xô ri ho amnhĩ kwỳjê jahkre ho ri apa hkêt nê. Te mẽ ate hã ano hkêt pyræk jakamã na pa hte arĩ mẽ amã kapêr kot amnhĩrĩt mex xwỳnh kwỳ ho mẽ ajahkre ho pa. No kot amnhĩrĩt mex kêt xwỳnh o mẽ ajahkre hkêt nê. Te mẽ hkaràre kot amnhĩ nhĩpêx pyræk o na ka htem amnhĩ nhĩpêx o apa. Na hte mẽ hkaràre mẽõ mex kur kêt nê. ãm kormã katorxà hkà pix kaô. Ja pyrã nê ãm Tĩrtũm

kapêr kot amnhîrît mex xwÿnhhta pix na ka mẽ mar tÿx o apa nom kapêr kot amnhîrît mex kêt xwÿnhja ka mẽ mar mex kêt nê.

¹³ Nê mẽ hkaràre kormã Tĩrtũm kapêr mar kêt jakamã na htem kormã mẽmoj mex nê mẽmoj punuj pumunh kêt nê. Tã te mẽ ate mẽ kot amnhĩ nhĩpêx pyràk.

¹⁴ Mẽ kot Tĩrtũm kapêr mar mex xwÿnhjaja na htem hprĩ hã kapêr piitã mar tÿx nê. Kot amnhîrît mex xwÿnhhta mar tÿx nê mãânên kot amnhîrît mex kêt xwÿnhja nhũm mēhprĩ hã piitã mar tÿx nê. Te ho mẽ àptàr kot mẽõ mex kur o pata pyràk. Jao ra mẽ àptàr jamaxpêr o hamaxpêr o ri pa nê hamaxpêr o:

—Kot paj tãm amnhĩ nhĩpêx o ri ixpa nhũm ja inhmã mex nê. Nom kot paj axtem tanhmã amnhĩ tomnuj to nhũm ja ixpê omnuj nê. Jakamã kot paj tãm amnhĩ nhĩpêx pix o ri ixpa nhũm Tĩrtũm mã ja mex nê. Anê.

6

¹⁻² Na pu prem ra Tĩrtũm kapêr kot amnhîrît mex xwÿnhhta kwÿ ma. Tãm na ja:

Kris kot mẽ panê tanhmã amnhĩ nhĩpêx to hã harēnhja.

Nê mẽ pahte amnhĩ tomnuj kaga hã kot mẽ pamã karōja.

Nê amnhĩ kaxyw Tĩrtũm kôt mẽ pajamaxpêr ã mẽ pamã karōja.

Nê mẽ pahpê Tĩrtũm kra hã amnhĩ to amnhîrît kaxyw mẽ kot mẽ pahkrã kumrār ã pamã karōja.

Nê mẽ pahte Tĩrtũm mã tanhmã amnhĩ nhĩpêx to
ho papa hkukamã mẽ kot mẽ pahkrã hã ĩhkra
jaxwỳr nê mẽ pahto Tĩrtũm wỳr ã mẽ pamã
karōja.

Nê mẽ pahtyk nê akupỹm mẽ pahtĩr ã mẽ pa-
jarēnhja.

Nê Tĩrtũm kot nhỹrmã mẽ kot amnhĩ xà htỳx kãm
hamak tũm xà hwỳr mẽ kêp hkra hkêt xwỳnhjê
janorja.

Mẽmojja piitã pu mẽ ra harēnh mar tỳx nê. Prĩ hã
kot amnhĩrĩt mex. Tã kwa kêr pu mẽ hpānhã hijuk
ri kot amnhĩrĩt mex kêt xwỳnh kwỳ ma. Jao mẽ
pahpê Tĩrtũm kra xàptàr mex nê ri papa. ³ Jakamã
kwa kêr pu mẽ kot amnhĩrĩt mex xwỳnh kumrêx
kwỳ ma nê hpānhã hijuk ri kot amnhĩrĩt mex kêt
xwỳnh kwỳ ma. Nê axpēn mã harēnh rāhã ho ri
papa. Nà koja Tĩrtũm kãm ja prām pu mẽ ã amnhĩ
nhĩpêx anhyr rāhã o ri papa.

⁴⁻⁶ Na pre ra mẽ pahkwỳjaja Kris kaga nê htỳx ri
amnhĩ nhĩpêx o pa. Mẽ kot kapēr mar tỳx tã axtem
nê hkaga jakamã koja mẽ axte kapēr mar kêt nê.
Ra mẽ kãm mar prām kêt. Kot puj mẽ tee ri axte
mẽ kãm harēnh o papa kaprỳ. Na prem hprĩ hã
kuma. Tĩrtũm kãm mẽ ho hkra hprām ã harēnhja
nhũm prem hprĩ hã kuma nê kãm mar prām nê
hkôt amnhĩ xunhwỳ. Hāmri nhũm Tĩrtũm Karō te
mẽ panhĩpêx pyrã nê mẽ hkarō mã agjê nê mẽ kot
amnhĩ to mex o pa kaxyw tanhmã mẽ hkrã hto
nhũm prem ỹ hã tanhmã kãm amnhĩ nhĩpêx to ho
pa. Nê kãm Tĩrtũm kapēr mar prām nê. Nê axpēn
mã mex o mex ã harēnh o pa. Nê aa mẽ kot mẽmoj
pumunh kêt kwỳ pumu nê axpēn mã harēnh o:

—Nà Krisja ãm hāmri àhpumunh tỳx o àhpumunh

tỳx. Koja nhỹrmã akupỹn mẽ pahwỳr wrỳ nẽ axte mẽ pamã àhpumunh tỳx o amnhĩrĩt pu mẽ omu.

Anhỹr o kapěr tã tanhmã hamaxpěr to nẽ hkaga. Jakamã te mẽ kot axte Tĩrtũm pẽ Krata pĩ hã nhôr nẽ hpĩr pyràk. Nẽ te mẽ piitã mẽ noo mã tanhmã haprỳ hto nẽ tanhmã kãm kapěr punuj to pyràk. Jakamã kot pu mẽ tee ri akupỹm tãm mẽ unhwỳr prãm kaprỳ.

⁷ Na hte Tĩrtũm mẽ pahto mex rãhã ho pa. Jao mẽ pamã mẽ pahpur ã na rẽ pu mẽ kamã panhõ rũnh nẽ. Jakamã mẽ kot amnhĩ kaxyw Kris kôt hamaxpěr nẽ hkôt amnhĩ xunhwỳr prãm xwỳnhjaja te mẽ hpur mex nẽ kamã mẽmoj ô rũnh pyràk. Nẽ uràk nẽ amnhĩ to mex o pa. ⁸ Nom koja mẽ hpur kãm mẽmoj nhĩgrôt mex kêt japêr. Kamã mrônhi nẽ kahpare nẽ mẽmoj punuj pix hapôj nhũm mẽ tee ri omu nẽ hkaga kurê kumrêx. Tã mẽ kot Kris kaga xwỳnhjaja te pur punuj kot amnhĩ nhĩpêxta pyràk nhũm Tĩrtũm te kêp pur nhõ dôn pyràk. Jao tee ri amnhĩ tã mẽ kot amnhĩ nhĩpêx ã mẽ omu nẽ mẽ hkaga kurê kumrêx nẽ ma mẽ kot amnhĩ xà htỳx kãm hamak tũm xà pẽ kuwyta wỳr mẽ rẽnh pa.

⁹ E ixkràmnhwỳjaja. Inhmã mẽ akĩnh jakamã na pa ã mẽ amã mẽ kot Kris kaga xwỳnhjê jarẽnh anẽ. Nom te mẽ ate mẽ uràk kêt. Kris kôt mẽ ate amnhĩ xunhwỳr xwỳnh mex na ka mẽ. Ra mẽ ate hkôt amnhĩ xunhwỳr tỳx jakamã te mẽ apê pur mexta pyràk. ¹⁰ Na ka htem Kris kôt mẽ akwỳjê ho mex o ri apa. Te mẽ amã amnhĩ tã ma pyràk o axpẽn nhĩpêx o ri apa nhũm Tĩrtũm ja hã mẽ apumu. Tã koja tanhmã ja hã mẽ ato mex to. Kot tãm mẽ

panhîpêx o pa jakamã koja tanhmã mẽ ate axpên nhîpêx mex tota ã tanhmã mẽ ato mex to.

¹¹ Tã kêr ka mẽ arĩ ã axpên nhîpêx anhÿr o ri apa rãhã ty kê nhÿrmã ja hã mẽ ato mex nê. ã mẽ ate amnhĩ nhîpêx anhÿr o apaja na inhmã hprãm tÿx kumrêx. ¹² Kot kaj mẽ ã amnhĩ nhîpêx anê hãmri nê amã kaga nê apa hkêr nê. Nê amnhĩ nhîpêx o te Tirtûm kra hkwÿ htyk xwÿnhjaja kormã htîr ri kot amnhĩ nhîpêxta pyrâk. Na prem amnhĩ kaxyw Tirtûm mã hamaxpêr tÿx rãhã ho pa. Kot mẽ ho mex ã mẽ hã amnhĩ jarênhja nhûm prem amnhĩ tã kamã hamak rãhã ho pa. Tã amnhĩ tã kamã hamak o pa ry rax rãhã ty nhûm Tirtûm ra kot mẽ hã amnhĩ jarênh xà hkôt mẽ ho mex nê. Tã kêr ka mẽ urâk nê ã amnhĩ nhîpêx anhÿr o ri apa rãhã ty. ¹³⁻¹⁵ ã na pre finat Apraãwja amnhĩ nhîpêx anê. Kormã hkra hkêr tã nhûm Tirtûm kãm hkra nê kanrêhã htàmnhwÿjê hkukamã tanhmã mẽ harênh to nê kãm:

—Pa Apraãw. E inhma. Kot paj aprô mẽ war ato mex nê. Kot kaj war akra hãmri nê gaa nhûm akanrêhã war atàmnhwÿjaja ohtô rax kumrêx. ãm hãmri na pa ã mẽ hkukamã amã mẽ harênh anê. Kot paj amã amnhĩ jarênh xà hkôt ã anhîpêx anê. Ixpê mẽ anhîpêx xwÿnh na pa ã amã amnhĩ jarênh anê. Anê.

Tã ã kãm wa hkra jarênh anhÿr tã nhûm wa tokyx hkra hkêr nê. Nom tee ri ja hã amnhĩ pumu nê Tirtûm kot wa kãm hêx ã hkamnhix kêt nê. ãm hkamnâr rom ã hamaxpêr anê nê hamaxpêr o:

—Nà kot paj wa nhÿrmã ixkra. Tirtûm tãm kot wa inhmã wa ixkra jarênh kênã. Anê.

Tã nhũm amgrà xohtô rax kumrêx nê hapêx nhũm wa hkra. Nhũm axte amgrà hkwý hapêx nhũm wa hkanrêhã htàmnhwý hkwý. Ra Tĩrtũm kot mē hkukamã Apraãw mã mē harênh xà hkôt. Tĩrtũmja hihtýx o hihtýx nê àhpumunh o àhpumunh jakamã na pre amnhĩ jarênh xà hkôt ã wa kãm wa hkra nê wa htàmnhwýjê nhõr anê. Kot ra wa kãm hã amnhĩ jarênh xà hkôt. No ri nhãm mēhõ nhĩxi jarênh kôt wa kãm wa hkra jarênh kêt nê. Mēhõ kot we hihtýx o hihtýx o Tĩrtũm jakre nhũm we ri hixi jarênh kôt ã wa kãm mē harênh anê? Amrakati kumrêx. Jakamã na pre wa kãm amnhĩ jarênh o:

—Nà ixàhpumunh xà hkôt na pa ã war amã war akra jarênh anê. Anê.

¹⁶ No pika ja kamã na htem ã amnhĩ jarênh anhýr kêt nê. Na htem mēhõ mã tanhmã mēmoj tã amnhĩ jarênh to kaxyw nê mēhõ hihtýx o kot hakrenh xwýnh nhĩxi jarênh kôt amnhĩ jarê. Nê amnhĩ jarênh o:

—Nà ixte jahti noo mã ã amã amnhĩ jarênh anhýr jakamã ãm hãmri na pa ã amnhĩ jarênh anê. Anê.

Kot hã amnhĩ to hêx nhũm hihtýx o kot hakrenh xwýnh ta kot hã harênh mar nê hã tanhmã homnuj to pymaj na htem ã mē hixi jarênh kôt mēmoj tã amnhĩ jarênh anê. Hãmri nê kot tanhmã hã ho pymaj ra kot amnhĩ jarênh xà hkôt tanhmã mēmoj nhĩpêx to. ¹⁷ Nom Tĩrtũm na hte uràk nê nhãm mēhõ nhĩxi jarênh kôt ri mēmoj tã amnhĩ jarênh kêt nê. Na hte tãm amnhĩ jarênh xà hkôt mēmoj to anê nê aa hã amnhĩ to hêx kêt nê. Na pre mē pahpê hkrajê mã kãm:

—Kot paj nhÿrmã mẽ ato mex rax nê. ãm hãmri na pa mẽ amã amnhĩ jarẽ. Ixte amnhĩ pumunh xà hkôt na pa ã mẽ amã amnhĩ jarẽnh anê. Anê.

Mẽ pahte ãm hãmri kot amnhĩ jarẽnhja mar nê amnhĩ to hêx kêt ã omunh kurê kumrêx kaxyw. Koja Tĩrtũm mẽmoj tâ ã amnhĩ jarẽnh anê hãmri nê hijuk ri axtem hpãnhã tanhmã amnhĩ jarẽnh to hkêt nê. ¹⁸ Jakamã koja nhÿrmã ma amnhĩ wÿr mẽ pahto àpir ã amnhĩ jarẽ hãmri nê ãm hãmri amnhĩ jarẽ nê amnhĩ jarẽnh o:

—Nà ãm hãmri ixte amnhĩ pumunh xà hkôt na pa mẽ amã ja hã amnhĩ jarẽ. Anê.

Koja ã amnhĩ jarẽnh anê hãmri nê hijuk ri axte hpãnhã tanhmã mẽmoj jarẽnh to hkêt nê. Ra kot ã amnhĩ jarẽnh anhÿrja koja arĩ rãhã nê. Jakamã e kwa kêr ka mẽ tee ri amnhĩ kukamã ajamaxpêr o ri apa hkêt nê. Ra mẽ pamex nê ri papa kaxyw Tĩrtũm kôt amnhĩ xunhwÿr jakamã kêr pu mẽ arĩ kot mẽ pahto mex rax xà hã arĩgrota jamâr rãhã ho ri papa.

¹⁹ Na hte kanôre ho htÿx xàja kanôre ho htÿx nhũm ma gô hkôt pa hkêt nê. Ja pyrà nê kot puj mẽ Tĩrtũm kot mẽ pahto mex xà kamã pajamak o papa hãmri nê hkaga hkêt nê.

Amnepê mã na pre hte mẽ panhõ patre maatija Tĩrtũm mã amnhĩ jarẽnh xà hã ixkre hwÿr agjê nê hkôt ã kupêxê ho hitom maati hwÿr agjê nê kamã mẽ ho Tĩrtũm wÿr o kuhê. Tã nhũm Jejus akupÿm kaxkwa hwÿr api nê Tĩrtũm ri hkrĩ hãmri nê patre maatita pãnhã tãm mẽ pahto hwÿr o hkrĩ. ²⁰ Na pre ra mẽ pakukamã kaxkwa hwÿr api nê kamã pa ho pa nê finat Mekijetekja pyrà nê kêp mẽ panhõ

patre maati. Tã koja mẽ pahto Tĩrtũm wỳr rãhã nẽ pa ho pa.

7

Patre Mekijetek jarẽnh

¹⁻³ E kot paj ixprĩ hã mẽ amã tanhmã finat Mekijetekja jarẽnh to ka mẽ inhma. Krĩ pẽ Sarẽ kamã na pre kẽp mẽ õ pahi nẽ mããnẽn kẽp mẽõ patre. Sarẽja mẽ pakapẽr kãm kẽp: “Mẽ hamakêtkati nẽ ri mẽ pa xwỳnhjẽ nhõ krĩ.” Jakamã Mekijetekja mẽ pakapẽr kãm kẽp: “Mẽ hamakêtkati nẽ ri mẽ pa xwỳnhjẽ nhõ pahi.” Nẽ mããnẽn kẽp: “Pahi kot tãm amnhĩ nhĩpêx o pa xwỳnh.” Nẽ Mekijetek nhĩpêxà nẽ katorxà nẽ higêt nhĩxija mẽ pahte harẽnh mar kêt. Nẽ kator ã arĩgro nẽ htyk ã arĩgroja mããnẽn mẽ pahte harẽnh mar kêt. Tĩrtũm kapẽr ã kagà htũm kot tanhmã ja jarẽnh to hkêt. ãm Jejus pyrà nẽ kẽp patre hã mẽ ho Tĩrtũm wỳr rãhã ho pa xwỳnh pix ã kot harẽnh. ãm ja pix na mẽ pahte harẽnh mar. Nẽ kot amnhĩ to rax xwỳnh jakamã na pre Apraãw nhỹri omu nẽ hã hpijaàm kaxyw kãm hikukrêx kwỳ gõ. Na pre hkwỳjẽ mẽ ra mẽ urojẽ kutã amnhĩ xunhwỳ nẽ pijapu nẽ mẽ kẽp mẽ õ pahi ho 4 nẽ mẽ himex. Nẽ mẽ kẽp mẽ hikukrêx kwỳptà nẽ hamỳ nẽ ma õ krĩ hwỳr o mõ. Nẽ kormã pry hã mõi ri Mekijetek kaxpa nhũm amnhĩ wỳr omu nẽ kãm:

—Pa Apraãw? E kêt Tĩrtũm ato mex nẽ ka amex nẽ apa. Anẽ.

Nhũm amnhĩ tã kuma nẽ hkĩnh nẽ. Hãmri nẽ kãm mẽ hikukrêx kwỳptà xwỳnhhta hkwỳ gõ nhũm hamỳ nẽ ma amnhĩm o mõ. ⁴ Na pre Apraãw

kot amnhĩ to rax ã omu nẽ kãm mẽmojta kwỳ gõ. Kêp mẽ pahpê Ijaew pàr krax jakamã mãănẽn kot amnhĩ to rax tã Mekijetekja uràk nẽ kot amnhĩ to rax ã omu nẽ kãm mẽmota kwỳ gõ. ⁵ Finat Mojes kot Ijaew mã Tĩrtũm kapêr jarênh xà hkôt kãm kugõ. Na pre mẽ kãm:

—Mẽ akwỳ pê finat Rewi hkanrêhã htàmnhwỳjaja kêp mẽ anhõ patre jakamã kêr ka mẽ kãm mẽ akukrêx kwỳ nhõr o ri apa. Kot kaj mẽ akrit kêp 10 nẽ kãm ho pixi nẽ agõ. Nẽ mẽ akàxpore kêp 10 nẽ kãm hõ gõ. Kêr ka mẽ ã mẽ kãm mẽ akukrêx nẽ mẽ akrit kwỳ nhõr o apa anẽ. Nẽ kêr ka mẽ kãm mẽmoj mex pix gõ. Mẽ kêp mẽ akwỳ na mẽ. Mẽ apiitã mẽ apê Apraãw kanrêhã htàmnhwỳ jakamã kêr ka mẽ ã mẽ hipêx anhỹr o apa. Anẽ.

⁶ Tã Mekijetekja kêp Rewi hkwỳ hkêt tã nhũm Apraãw amarĩ ã hipêx anẽ nẽ kãm pahi htyk xwýnhjê kukrêxta kwỳ gõ. Jao hikukrêxta kamã mẽmoj kêp 10 nhũm omu nẽ kamã kãm ho hpýnh nẽ kugõ. Na pre ã kãm mẽmoj nhõr anẽ. Hãmri nhũm amnhĩm hamỳ nẽ kãm:

—Nà ãm hãmri koja Tĩrtũm ato mex rax nẽ. Anẽ.

Ra Tĩrtũm kot Apraãw kanrêhã kãm htàmnhwỳ ho ohtô nẽ mẽ hkukamã mẽ harênh jakamã nhũm Mekijetekja ã kãm Tĩrtũm kot ho mex ã harênh anẽ. ⁷ Mẽ kot amnhĩ to rũnh o mẽ hakrenh xwýnh pixjaja Tĩrtũm kot mẽ ho mex kaxyw mẽ ho àhwỳr o pa jakamã na pre Apraãw o Tĩrtũm wỳ. Jao kot amnhĩ to rax o kot hakrenh ã amnhĩ to amnhĩrĩt. ⁸ Hãmri nẽ Rewi hkanrêhã htàmnhwỳ kot amnhĩ nhĩpêx pyrà nẽ Apraãw o Tĩrtũm wỳ nẽ kêp mẽmojta jamỳ. Mẽ uràk nẽ mẽmoj kamã kêp 10ja rũm ho

hpÿnh nê amnhĩm hamÿ. Nom kot amnhĩ to rax o Rewi hkanrêhã htàmnhwÿjê jakrenh. Tĩrtũm kapêr ã kagà htũm kot Rewi hkanrêhã htàmnhwÿjê htyk par ã mē harēnh tã tanhmã Mekijetek htyk ã harēnh to hkêť jakamã kot amnhĩ to rax o kot Rewi hkwÿjê jakrenh.

⁹⁻¹⁰ Nê kot pry kamã Apraãw kaxparta ã kormã Rewi kator kêt tã kêp Apraãw kanrêhã htàmnhwÿ mã xwÿnh. Jakamã nhũm Apraãwja Mekijetek mã mē hikukrêxta kwÿ nhôr jao te Rewi mã ôr pyràk. Tã nhũm amgrà xohtô nê hapêx nhũm Rewi hkanrêhã htàmnhwÿjaja hapôj nê kêp mē ô patre nê ri pa. Jao Mekijetek pyrà nê mē kêp mē hikukrêx kwÿ jamÿnh o ri pa.

¹¹ Nê finat Mojes na pre Ijaewjê mã tanhmã Rewi hkanrêhã htàmnhwÿjê jarēnh to. Kormã mē hapôx kêt ri nhũm hkwÿjê mã tanhmã mē harēnh to. Mē kêp patre hã mē harē. Tã nhũm mē hapôj nê hprêk nê mē ho Tĩrtũm wÿr o ri mē hkôt pa. Nom mē kot tãm amnhĩ nhĩpêx o pa kaxyw na prem tanhmã mē hkrã hto hkêť nê. Tanhmã kot mē amnhĩ to nê ã mē hipêx anê? Jakamã nhũm Tĩrtũm mē hpãnhã mē pahwÿr kÿj rũm mēhõja mē nhũm mē pahwÿr wrÿ. Nom kêp Rewi hkanrêhã htàmnhwÿ hkêť. Nê mããnen kêp Rewi hpãm Arãw kanrêhã htàmnhwÿ hkêť. Axtem te Mekijetek kot amnhĩ nhĩpêx pyràk xwÿnh na pre. Jejus Krisja. Tãm na pre mē pahwÿr wrÿ hãmri nê tanhmã mē pahkrã hto pu mē ŷ hã tãm amnhĩ nhĩpêx o papa.

¹² No Mojes kapêr kot Rewi hkanrêhã htàmnhwÿ pixjaja kêp mē ho Tĩrtũm wÿr xwÿnh ã mē harēnh. Tã nhũm Krisja mē pahwÿr wrÿ nê mē hpãnhã kêp

mê pahto àhwỳr o pa xwỳnh. Jakamã na pu htem axte Mojes kapêr kôt amnhĩ nhĩpêx kêt nê. Pãnhã Jejus kapêr kôt pix mã amnhĩ nhĩpêx o papa.

¹³⁻¹⁴ Nê Jejus kêp Rewi hkanrêhã htàmnhwỳ hkêt. Katorxà hkôt kêp Apraãw tàmnhwỳ Juta hkanrêhã htàmnhwỳ na pre. Ra mẽ pahte ja mar mex. Aa Juta hkanrêhã htàmnhwỳjaja kêp patre hkêt. Na pre Tĩrtũm jajê mã mẽ kot mẽmoj nhõr xà hã mēsti kunĩhtita ã kãm mẽmoj nhõr nê hkwỳjê ho hwỳr ã mẽ kãm karõ hkêt nê. ãm Apraãw tàmnhwỳ Rewi hkanrêhã htàmnhwỳjê mã pix mã na pre ã mẽ kãm ja hã karõ anê. Tã nhũm Jejus wrỳ nê mẽ hpãnhã mẽ pahto hwỳr o pa. Mẽ uràk nê kêp Rewi hkanrêhã htàmnhwỳ hkêt axtem kêp Juta hkanrêhã htàmnhwỳ htã Rewi hkwỳjê hpãnhã mẽ pahto Tĩrtũm wỳr o pa.

Mekijetek pyrà nê mẽ pahto Tĩrtũm wỳr xwỳnh jarênh

¹⁵⁻¹⁹ Nê Ijaewja na prem Mojes kapêr mar tỳx nê hkôt amnhĩ nhĩpêx tã aa amnhĩ to mex kêt nhũm Tĩrtũm tee ri ja hã mẽ omu nê hamaxpêr o:

—Nà Rewi hkanrêhã htàmnhwỳjaja kêp mẽ õ patre nê mẽ ho ixwỳr o pa htã nhũm mẽ arĩ htỳx ri amnhĩ tomnuj pix o pa. Jakamã koja mẽ axte ri mẽ ho ixwỳr o pa hkêt nê. Anê.

Hãmri nê mẽ pakaxyw mẽ pahto àhwỳr xwỳnhja ta nê ãm. Kra Jejusja nhũm kuta nê ãm. Tãm na hte Rewi hkwỳjê rom tanhmã mẽ pahkrã hto pu mẽ kukwak ri tãm amnhĩ nhĩpêx nê Tĩrtũm kôt amnhĩ nhĩpêx mex nê. Jao nhỹrmã ma mẽ pahte Tĩrtũm nhõ krĩ hwỳr paxàpirja jamãr o papa.

Jejus na hte Mekijetek pyrà nê kêp mē panhō patre maati nê mē pahto Tĩrtũm wỳr rāhā ho pa. Kêp Rewi hkanrēhā htāmnhwỳ hkêt tã Tĩrtũm pyrà nê kêp htĩr tũm nê pa ho pa xwỳnh jakamā na pre Tĩrtũmja mē pakaxyw kuta nê mē pahwỳr kumē. Kapēr ā kagà htũm kot harēnh kot:

Kot kaj Mekijetek pyrà nê mē ho ixwỳr rāhā ho ri apa. Anē.

²⁰⁻²¹ No Rewi hkwỳjê mã na pre ā kapēr anhỳr kêt nê. Ām Jejus pix mã ā kapēr anē nê kām:

E kot kaj apê mē ho ixwỳr rāhā o apa xwỳnh. Kot paj nhỹrmā apānhā axtem mēhō xām kêt nê.

Ām kapxipix kot kaj mē ho ixwỳr o apa rāhā ho rāhā. Ām hāmri na pa amā ā ixkapēr anē.

Ixpê Pahi Maati hā ā ajarēnh anē.

²² Anhỳr jao Jejus kot amnhĩ to rax o Rewi hkwỳjê jakrenh par ā ho amnhĩrīt. Mē kot Ijaew mã Tĩrtũm kapēr jarēnh nhũm mē kot mar nom hkôt amnhĩ nhĩpêx kêt jakamā nhũm Tĩrtũm mē hpānhā Jejus xām. Tapxipix na hte tanhmā mē pahkrā hto pu mē tām amnhĩ nhĩpêx mex o ri papa. ²³ Rewi hkwỳjaja na prem axpēn mỳr pē kêp mēō patre nê ri pa htā htyk pa nê hapêx. ²⁴ Nom Jejusja htĩr tũm nê pa ho pa xwỳnh jakamā koja mē urāk nê aa hapêx kêt. Koja mē pahto Tĩrtũm wỳr rāhā ho pa nê aa jam urer kêt nê. ²⁵ ā Jejus kot amnhĩ nhĩpêx anhỳr jakamā te kêp Tĩrtũm wỳr mē panhō pry pyrāk. Na pu htem hkôt amnhĩ xunhwỳ nhũm mē panê mē pahte amnhĩ tomnui piitā rēnh pa nê mē pahpê Tĩrtũm kra hā mē pajarē.

²⁶ Nê ām hāmri kêp mē pahto Tĩrtũm wỳr xwỳnh maati mex na. Mē pakurom tām kot amnhĩ nhĩpêx

mex o pa nê aa kot tanhmã amnhĩ tomnuj to hkêt. Tã ra Tĩrtũm kot amnhĩ wỳr ho àpir jakamã nhũm ra kuri mẽ pahto hwỳr rãhã ho pa. ²⁷ Nê kot amnhĩ to rax o wam mẽõ patre maati jê jakrenh. Wamtaja na prem hkwỳjê pyrà nê amnhĩ tomnuj o pa. Jakamã na prem apkati mẽ amnhĩ tomnuj pãnhã Tĩrtũm mã mẽmoj gõ nê kãm amnhĩ jarẽ nê amnhĩ to kuwỳ. Hãmri nê rĩ kormã kot nhãm mẽ hwỳr mẽ mrar xwỳnhjê mã mẽ ho anê nê mẽ hpãnhã Tĩrtũm mã mẽmoj nhõr pê mẽ ho kuwỳ. No kêt Jesusja wam patre maati rom aa kot amnhĩ tomnuj kêt jakamã na pre hte mẽ uràk nê amnhĩ tomnuj pãnhã Tĩrtũm mã mẽmoj nhõr o pa hkêt nê. ãm mẽ papajaja na pre mẽ pahte amnhĩ tomnuj pãnhã htyk o kãm amnhĩre. ãm htyk tipxi htã mẽ pahpiitã mẽ pahpãnhã amnhĩrer pa. Jakamã koja axte ã amnhĩ nhĩpêx anhỹr kêt nê. Mo kaxyw kot kêt axte mẽ panê ty?

²⁸ Mojes kapêr kôt na pre Ijaew amnhĩm Rewi hkwỳjê xunhwỳ nhũm mẽ kêp mẽ õ patre nê ri pa. Tã no nhũm mẽ uràk nê arĩ amnhĩ tomnuj o pa nhũm Tĩrtũm tee ri mẽ omu nê mẽ hpãnhã mẽ pakaxyw Krata xãm nê kãm:

—Nà kapxipix mẽ kurom ate tãm amnhĩ nhĩpêx o apa jakamã kapxipix kot kaj mẽ hpãnhã mẽ ho ixwỳr o apa rãhã ho rãhã. Anê.

8

Jejus kêp mẽ pahto Tĩrtũm wỳr xwỳnh maati hã harẽnh

Rukre 22.20; Sikũn Korĩt 3.6-11

¹ E kot paj axtem tanhmã mẽ amã mẽ pahto Tĩrtũm wỳr xwỳnh maatita jarẽnh to ka mẽ inhma. Na hte kaxkwa kamã Tĩrtũm nhĩhkô hã hkrĩ. ĩhkô hã kệp Pahi Maati hã hkrĩ xà hã upôk rũm hkrĩ ho hkrĩ. ² Wam patre maatijaja na prem Tĩrtũm nhõrkwy kaàkre wỳr mra nẽ kamã hitom maati kamã mẽ ho Tĩrtũm wỳr o pa. Nom nhũm Jesus na hte mẽ kurom kaxkwa kamã Tĩrtũm nhõrkwy mex kãm mẽ pahto àhwỳr o hkrĩ. Ōrkwy kaàkreja na prem ĩhkra ho hipêx nom kaxkwa kamã ōrkwy mexja na pre mẽhõ ĩhkra ho hipêx kêt nẽ. Tĩrtũm na pre tanhmã hipêx to nhũm kamã Jesusja mẽ pahto hwỳr o hkrĩ.

³ Nẽ mẽ pahpê Ijaew nhõ patre maatijaja na prem mẽ ho hwỳr kaxyw nẽ mẽ kot amnhĩ tomnuj pãnhã Tĩrtũm mã mẽmoj nhõr kôt mẽ ho kuwỳ. No Kris na hte ã amnhĩ nhĩpêx anhỳr kêt nẽ. Ra htyk o kot kãm amnhĩ nhĩ nhõr jakamã na hte wam patre maati pyrà nẽ xatã kãm mẽmoj nhõr kêt nẽ.

⁴ Tã na hte arĩ Ijaew Mojes kapêr kôt amnhĩm Rewi hkwỳ kệp mẽ õ patre kaxyw mẽ unhwỳ nhũm mẽ ho Tĩrtũm wỳr o pa. No Jesus kệp Rewi hkanrêhã htàmnhwỳ hkêt. Katorxà hkôt kệp Juta hkanrêhã htàmnhwỳ jakamã kop apu arĩ jar pika ja kamã htĩr nẽ pa ronhỹx Ijaew nhõ patre pyrà nẽ kệp mẽ ho Tĩrtũm wỳr o pa xwỳnh kêt. ãm Rewi hkanrêhã htàmnhwỳ pixjaja na htem mẽ kaxyw kãm mẽmoj gô nẽ hkôt mẽ ho kuwỳ. ⁵ Jar na htem arĩ ã amnhĩ nhĩpêx anhỳr o pa nom kaxkwa kamã na htem ã amnhĩ nhĩpêx anhỳr hkêt nẽ.

Nẽ jar Tĩrtũm nhõrkwy kaàkreja te kot kaxkwa kamã ōrkwy mexta pyrāk. Na pre Mojes ōrkwy

kaàkre nhîpêx kaxyw nhûm Tîrtûm tanhmã kãm hã karõ hto nê kãm:

—E jãã hixêt prêk nhîmôk ã axãmta ã na pa pre amã ixkreta kukamã ixprî hã tanhmã mẽ ate hipêx to hã amã karõ. Tã kêr ka ã hipêx anê. Anê.

Hãmri nhûm kuma nê kot kãm hã karõ xà hkôt hipêx. Hãmri nhûm mẽ ô patre maati ixkreja kamã mẽ ho Tîrtûm wÿr o pa. Na prem ã amnhî nhîpêx anhÿr o pa.

⁶ Tã nhûm ra Tîrtûm axtem mẽ hpãnhã mẽ pakaxyw Kris xãm nhûm hte mẽ pahto hwÿr mex o wantajê jakre. Na hte kaxkwa kamã mẽ pahpiitã mẽ pahpumunh mex rãhã ho hkrî nê wantajê rom tanhmã mẽ pahkrã hto pu mẽ tãm amnhî nhîpêx o ri papa. Tîrtûm kot finat Mojes mã kapêrja mex nê nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mẽ pahtyk tã akupÿm pahtîr nê nhÿrmã Tîrtûm mẽ Jesus wa kuri pamex nê pahtîr tûm nê papa ho papa nê axte pahtyk kêt nê. ⁷ Kêp apu Tîrtûm kot Mojes mã kapêr kôt mẽ kot tãm amnhî nhîpêx o pa ronhÿx pre Tîrtûm axte kapêr nyw ã kagà hkêt nê. ⁸ Nom wam kapêr tûmta na pre mẽ mar tÿx htã arî amnhî tomnuj rãhã ho pa nhûm tee ri ja hã mẽ omu nê mẽ kãm:

Nà kot paj axte nhÿrmã mẽ apê Ijaew mã axtem tanhmã ixkapêr to.

⁹ Amnepêm mẽ anhîgêjtê mã na pa pre ixkapêr.

Na pa pre Ejit pê mẽ kator nê mẽ kot tanhmã amnhî nhîpêx to ho pa kaxyw tanhmã hã mẽ kãm karõ hto.

Nom na prem ixkapêr ma nê ãm kuma nê ixkôt amnhĩ nhĩpêx kêt nê. Pa tee ri ja hã mẽ omu hãmri nê mẽ hkaga.

¹⁰ Tã kot paj mẽ apê mẽ hkanrêhã mẽ htàmnhwý nywjê mã axtem ixkapêr ka mẽ ixkapêr nywja ma.

Kot paj nhỹrmã tanhmã mẽ akrã hto ka mẽ ixkapêr nyw mar tỳx nê hã ano htỳx nê ho apa.

Nê akĩnh nê apa.

Nê ixkôt ri amnhĩ nhĩpêx mex o apa.

Nê axpên mã ijarênh o: “Nà ãm hãmri Tĩrtũm kêp mẽ panhõ Tĩrtũm na.” Anhỹr o ri axpên mã ijarênh o apa.

Pa amnhĩ tã mẽ ama nê mẽ apumu nê amnhĩ xwar mẽ apê ixkra hã amnhĩm mẽ ajarê.

¹¹ Kot kaj mẽ apiitã ixte amnhĩ nhĩpêx kôt ixpumunh mex o ri apa. Mẽ akàxpore rũnh xwỳnhjaja nê mẽ akàxpore hkryre xwỳnhjaja mẽ apiitã ixpumunh mex jakamã kot kaj mẽ ri axte ixtã tanhmã axpên kukjêr to ho ri apa hkêt nê.

¹² Nê kot paj mẽ ato mex rax o ixpa.

Nê axte tanhmã mẽ ate amnhĩ tomnu hto ho apaja mã ijamaxpêr kêt nê. Anê.

¹³ Nê koja mẽmoj ra htũm hãmri nê hapêx tokyx anê. Ja pyrà nê na pre Tĩrtũm mẽ pamã kapêr tũmta jarênh o:

—E kêr ka mẽ axte ixkapêr tũm mar kêt nê. Pãnhã ixkapêr nyw pix măn mar o apa nê ãm kôt pix mã măn amnhĩ nhĩpêx rãhã ho ri apa. Anê.

9

Tĩrtũm nhõrkwỹ kaàkre jarẽnh

¹ Nẽ amnepêm na pre finat Mojesja mẽ panhĩgê
 nẽ mẽ pahpãmjê mã tanhmã Tĩrtũm nhõrkwỹ
 kaàkre jarẽnh to. Tanhmã mẽ kot hipêx to nẽ kamã
 tanhmã amnhĩ nhĩpêx to hã mẽ kãm karõ. Nẽ
 kamã tanhmã mẽ kot amnhĩ to Tĩrtũm wỳr to hã
 mẽ kãm karõ. Nẽ tanhmã mẽ hkwỳjê ho hwỳr toja
 nhũm pre mãănẽn mẽ kãm hã karõ. No Tĩrtũm
 nhõrkwỹ kaàkreja kêp õrkwỹ kumrêx kêt. Âm mẽ
 kot omunh nẽ kaxkwa kamã õrkwỹ kumrêx mã
 hamaxpêr kaxyw na pre. ² Jakamã nhũm prem
 Mojes kapêr ma nẽ hipêx. Kamã hitom hamêxkrut.
 Wam hitom kamã na pre kanê hprêêti xãm nẽ kutã
 mêsti xãm. Nẽ mêsti nhĩmõk ã Tĩrtũm mã õ pãwti
 jaxwỳ. Mẽ panhõ patre na pre htem Tĩrtũm mã
 kugõ nẽ mêsti ã kãm haxwỳ hãmri nẽ hkwỳjê ho
 kuwỳ. Tã hitom ja na prem kêp Tĩrtũm nhõ hitom
 mex ã harẽ.

³⁻⁴ Nẽ hitom wa hkaêx kãm na pre kupêxê ho
 hakwakre kahê xàja ajê. Haturxà kamã hitomja
 na prem Tĩrtũm nhõ hitom maati hã harẽ. Tĩrtũm
 na pre te hirã htỳx kãm hwỳr wrỳ nẽ te kamã hkrĩ
 pyrãk. Nẽ kamã na pre Tĩrtũm mã mēhkuxwa xà ho
 xê xà hã mēs kunĩhtija kuhê. Na prem ôr o hipêx
 nẽ kamã âm nhũm kuhê. Nhũm pre hte mẽõ patre
 hwỳr agjê nẽ kutã kuhê nẽ mẽ ho Tĩrtũm wỳ. Nẽ
 mēs kunĩhti haxwỳja hitom maati kamã kuhê. Na
 prem pĩ ho hipêx nẽ ôr o hpro nẽ kamã âm. Mêstija
 kaxwỳnh kãm na pre htem mẽmoj jagjê.

Tĩrtũm kot Ijaew mã tanhmã mẽ kot amnhĩ
 nhĩpêx to ho pa hã karõ nẽ kẽn po hã mẽ

kām hã kagàja nhũm prem kamã kuxà nhũm hikwỹ.

Ně mãănẽn ôr o xijereja xà nhũm hikwỹ. Ně xijere kamã amnepê mã Tĩrtũm kot kaxkwa rũm mẽ hwỳr mẽõ rēnh kwỳ hikwỹ. Mẽõja mẽ kot kãm: “Manã” anhỹr xwỳnhja na prem hkwy hkawrà nẽ xijere kamã kugjê hãmri nẽ mēsti kamã kuxà.

Ně finat Arãw nhõ kô kot ho amnhĩ kaxpar xà htũmta nhũm prem kamã kuxà. Tĩrtũm kot tanhmã ho nhũm kurũm pixôrà muxre hapôx xwỳnhhta nhũm prem mãănẽn mēs kunĩhti kamã kuxà nhũm hikwỹ.

⁵ Nẽ himõk ã Tĩrtũm kapēr o wrỳk xwỳnh wa hkarõ nhĩpêxja wa hamẽxkrut nẽ axpẽn kutã wa hkõn krã ho hkrĩ. Axpẽn wỳr hara koror nẽ wa hkrĩ. Patre maati kot omunh nẽ Tĩrtũm kot mẽ hkôt pa ho paja mã hamaxpēr kaxyw. Nẽ wa hkaêx kãm ahkaprỳja Tĩrtũm kot mẽ nẽ mẽ kot amnhĩ tomnuj rēnh mã hamaxpēr xà na pre.

Ã Tĩrtũm nhõrkwỹ kaàkre kot anhỹr. No kot paj ixprĩ hã mẽ amã piitã harēnh par kêt nẽ. ⁶ Na pre hte mẽõ patre apkati mẽ wam hitom wỳr agjê nẽ kamã Ijaew ho Tĩrtũm wỳr o pa. ⁷ No hitom maati ja ãm mẽ õ patre maati pix na pre hwỳr agjê. Nom apkati mẽ hwỳr pa nẽ gjêx kêt ãm amgrã pỹnh kãm hwỳr gjêx pỹnh nẽ. Nẽ hwỳr gjêx kaxyw nẽ mẽmo mry pa nẽ hkamrô ru nẽ o pa nẽ hitom maati hwỳr ho agjê. Hãmri nẽ ho mēs kunĩhti nhĩmõk kamĩ nẽ Tĩrtũm mã kãm:

—Pa Tĩrtũm. E ota mry kamrôta. Mẽ ixpê akwỳjaja mẽ ixte amnhĩ tomnuj jakamã na pa mẽ amnhĩ pãnhã mẽmo mry nhõkre jakà nẽ kupĩ nẽ

hkamrô ru nê man awÿr o mra. Te kot mē ixte amnhĩ tomnuj mÿrapê htyk pyrāk. Jakamã kwa ã mē ixte amnhĩ nhĩpêx anhÿrja ã mē ixpumunh hkôt mē inhnê mē ixte amnhĩ tomnuj rê.

Anhÿr o mē amnhĩ to kuwÿ. ⁸ Nê patre maati pix na pre hitom maatija wÿr agjê nê mē ho Tĩrtũm wÿ. Ijaew na prem ixkre kapem hamãr o kuhê nê hwÿr gjêx kêt nê. Tĩrtũm Karô kot hã mē kãm karô xà hkôt. Te Tĩrtũm pê amÿm kuhê pyrāk. Tã na htem jarãhã arĩ Ijaew kanrêhã mē hkra nê mē htamnhwÿjaja ã amnhĩ nhĩpêx anhÿr o pa. Jao mē higêtjê pyrã nê Tĩrtũm pê amÿm kuhê.

⁹ Mē kot arĩ Tĩrtũm mã mry hpar nê hkamrô ho mēmoj kamĩr nê amnhĩ to hwÿr o pa htã na htem arĩ hamaxpêr punuj pix o pa.

¹⁰ Tĩrtũm kapêr tũm kot tanhmã mēmoj tã mē kãm karô hto.

Na pre tanhmã mē apkur xà hã mē kãm karô hto nhũm htem pix kur o pa.

Nê tanhmã mē hkôm xà hã mē kãm karô hto nhũm htem pix o hkôm o pa.

Nê tanhmã amnhĩmnuj to hã tanhmã mē kot amnhĩ kuhõnh to hã karõja nhũm htem hkôt pix mã tanhmã amnhĩ kuhõnh to ho pa.

Nê tanhmã mē kot ri mē hikukrêx kuhõnh to hã mē kãm karõja nhũm htem kôt pix mã tanhmã kuhõnh to ho pa.

Ã na pre Tĩrtũm Kris kukamã mē kãm mēmoj tã karô rax anê. Kris kutêp pix mã ã mē kot amnhĩ nhĩpêx anhÿr kaxyw. No mē pahte arĩ ã amnhĩ nhĩpêx anhÿr kaxyw kêt. Na pre ra Kris mē pahwÿr wrÿ nê Tĩrtũm kapêr tũm o hapêx nê hpãnhã mē pamã kapêr nyw jarê pu mē hpãnhã

nywta kôt pix mã amnhĩ nhĩpêx o papa. Kapêr nywja mex o mex. Nê mex o wamta jakrenh.

Kris htyk o mẽ pahte amnhĩ tomnuj pãnhã amnhĩrer ã harênh

¹¹ Tã na pre Krisja tãm mẽ pahwÿr wrÿ nê kêp mẽ pahto Tĩrtũm wÿr xwÿnh maati nê patre hpãnhã mẽ pahto hwÿr o pa. Nom jar pika ja kamã mẽ kot mẽ ãhkra ho Tĩrtũm nhõrkwỹ kaàkre nhĩpêxta wÿr àr nê kamã mẽ pahto hwÿr kaxyw na pre wrÿk kêt nê. Na pre ra akupÿm kaxkwa hwÿr api nê kamã õrkwỹ mex wÿr axà nê kamã tanhmã mẽ pahto mex to nê tanhmã mẽ pahto Tĩrtũm wÿr to rãhã ho hkrĩ. ¹² ã kaxkwa kamã Tĩrtũm nhõ hitom maati ja wÿr àr tipxi htã mẽ pahpiitã mẽ pahte amnhĩ tomnuj pãnhã amnhĩrer pa. Nom mẽmo mry kamrô ho mẽ pahpãnhã amnhĩrer kêt nê. Mõx kamrô rÿ motre kamrô ho mẽ pahpãnhã amnhĩrer kêt nê. Amnhĩ kamrô ho na pre mẽ pahpãnhã amnhĩre. Tyk nê hkamrô pikapĩrta o mẽ pahpiitã mẽ pahpãnhã amnhĩrer pa.

¹³ Nê amnepêm Ijaew kot Tĩrtũm kapêr tũm kôt amnhĩ nhĩpêx mex o pa hkêt jakamã nhũm tee ri mẽ omu nê mẽ kot amnhĩ tomnuj o mẽ pa xwÿnh ã mẽ harê. Jakamã na pre mẽo patre xatã mry kamrô ho mẽ hkamĩ. Mõx kamrô nê motre kamrô ho mẽ hkamĩ. Na pre mõx krare hkwÿ hpa nê ho hxêt nê hprà ho hkwÿjê kamĩ. ã na prem xatã mẽ hipêx anhÿr o pa. Tĩrtũm kot ja hã mẽ omunh nê mẽ mex ã mẽ harênh kaxyw. Nom te mẽ krãhkà pix mex pyrà nê mẽ hkrã kaxwÿnh kãm arĩ hamaxpêr punuj o pa. ¹⁴ ã na prem amnhĩ nhĩpêx anhÿr o pa. Nom Krisja mẽ kurom aa tanhmã amnhĩ tomnuj to hkêt jakamã na pre mẽ pahte

amnhĩ tomnuj xwýnhjê nê ty. Te mẽ kot amnhĩ nê môx rý motre hpar nê hkamrô runhta pyrâk o amnhĩ nhĩpêx nê mẽ panê Tĩrtũm mã amnhĩ gô nhũm pre mẽ kãm hkurê xwýnhjaja kupĩ. Na pre Tĩrtũm Karôja ã kot mẽ panê htyk anhỹr kaxyw tanhmã ho hihtỳx to. Karôja aa hapêx kêt kumrêx rãhã nê pa ho pa xwýnh jakamã na pre Kris tykja kukamã tanhmã ho hihtỳx to nhũm mẽ panê ty. Tapxipix na mẽ pahte tãm amnhĩ nhĩpêx o papa kaxyw kêp tanhmã mẽ pahkrã hto xwýnh. Jakamã na pu htem ra pajamaxpêr nyw o pajamaxpêr o papa nê pajamaxpêr o:

—Na pa pre tee ri inhmã amnhĩ krã hkôt tãm amnhĩ nhĩpêx o ixpa hprãm kaprý nê ãm amnhĩ tomnuj pix o ri ixpa. Tã Kris kot inhnê htyk o hkamrô pikapĩr ã harênh ma nê amnhĩ kaxyw hkôt ijamaxpêr tỳx nê nhũm amnhĩ tã ixpumu nê ixte tãm amnhĩ nhĩpêx o ixpa kaxyw ixãm. Jakamã kot paj ãm Tĩrtũm pix mã kãm tanhmã amnhĩ nhĩpêx to ho ri ixpa. Tĩr rãhã nê pa ho pa xwýnh jakamã kot paj nhỹrmã kuri uràk nê ixtĩr tũm nê ixpa ho ixpa. Anê.

¹⁵ Nê amnepê mã na prem piitã Tĩrtũm kapêr tũm kôt amnhĩ nhĩpêx mex o pa hkêt nê. Mẽ kot xatã hkôt amnhĩ nhĩpêx o pa hã amnhĩ jarênh tã hkôt amnhĩ nhĩpêx kêt nê. Jakamã na pre Kris wrý nê mẽ pahte hkôt amnhĩ xunhwýr mã xwýnhjê mã Tĩrtũm kapêr nyw jarê nê mẽ pamã:

—Kot paj mẽ anê ty nhũm Tĩrtũm ã ixte amnhĩ nhĩpêx anhỹrja kukwak ri mẽ ato mex rãhã ho pa. Anê.

Hãmri nê amnhĩ jarênh xà hkôt mẽ pahte amnhĩ tomnuj piitã hpãnhã amnhĩrer kaxyw mẽ panê ty.

16-17 Te jar pika ja kamã mēhō htyk kukamã hkrajê mã tanhmã amnhĩ jarēnh to pyrāk. Na htem htyk kaxyw nē hkrajê mã:

—Nà kot paj mēmo arĩgro hã ty ka mē inhmȳr pē ixpē ixkukrêx kwȳ o arĩk.

Anhȳr o na htem amnhĩ jarē. Hãmri nē ty nhũm hkrajaja amnhĩm ò mēmoj to àrĩk pa. Mē hipêêxà kukwak ri mē hikukrêx mex nē mȳr pē o pa. No kormã htĩr ri nhũm mē kormã kêp hamȳnh kêt nē. Ja pyrà nē na pre Tĩrtũmja Jejus htyk kukwak ri tanhmã mē pahto mex to pu mē kukwak ri mē pamex nē pahkĩnh nē ri papa.

18 Nē Tĩrtũm kapēr tũm kôt na pre hte mē ò patre mry pa nē ãm hkamrô runh kôt pix mã mē ho Tĩrtũm wȳr o pa nhũm amnhĩ tã mē omunh xà hkôt mē kuma nē tanhmã mē ho mex to.

19 Na pre finat Mojesja Ijaew mã Tĩrtũm kapēr tũm piitã harē nē harēnh pa hãmri nē mōx õxpĩ nē kaxyw motre hōxpĩ. Hãmri nē xijere kamã hamē wa hkamrô runh pa nē kamã gô hkwȳ ru. Hãmri nē kaxyw mēmo pĩ hpa hkryre pē “isop” jarēnhja kwȳ kukē. Nē kaxyw ôwēhti hkĩ kamrêkre hkwȳ hpy nē isop mē ho pihkàr pa nē mry kamrô o go. Hãmri nē ho hkwȳjê kamĩ. Nē ho Tĩrtũm kapēr ã kagà tũmta kamĩ. 20-22 Hãmri nē ho anhȳr pa nē mē kãm:

—Nà na Tĩrtũmja ixte mry kamrô ho mē akamĩr pumunh kôt mē pamã kapēr o: “E kot kaj mē ixkapēr kôt amnhĩ nhĩpêx o ri apa hã kot paj tanhmã mē ato mex to rãhã ho ri ixpa ka mē amex nē akĩnh nē ajamakêtkati nē ri apa. Jakamã kêr ka mē mry kamrô ho mēmoj piitã hkamĩr pa. Nē ho amnhĩ kamĩ. Kêr pa ja hã mē apumu hãmri nē axte

tanhmã mẽ ate amnhĩ tomnuj tota mã ijamaxpêr kêt nê.” Anê. ã na Tĩrtũm mẽ pamã kapêr anê. Anê.

Hãmri nê hpãnhã mry kamrôta o ôrkwỹ kaàkre kamĩ. Nê hkre kamã mẽmoj kuhê xwỹnh piitã nhũm ho hkamĩr pa. ã na pre mẽ ô patre mẽ mex kaxyw mẽ hipêx anhỹr o pa. Mẽ kot tũhã mẽmoj to hpỹnhre nê ho hkamĩr kêt jakamã kironhỹx pre mẽmoj piitã ã hipêx anhỹr o pa. Kop apu mẽ kot mry hpar nê hkamrô runh kêt ronhỹx pre Tĩrtũm arĩ mẽ kot amnhĩ tomnuj mã hamaxpêr rãhã ho pa.

²³ Na prem ã Tĩrtũm nhõrkwỹ kaàkre kamã mẽmoj kuhê xwỹnh piitã mex kaxyw hipêx anê. Te Tĩrtũm kot mẽ pahto mex nhũm mẽ pahte nhỹrmã ma kaxkwa hwỳr ô krĩ hwỳr paxàpirta pyrà nê. Nom mẽ kot mry hpar nê hkamrô runhta kukwak ri mẽ pamex nê papa hkêt. ãm mẽhõ kamrô kukwak ri mẽ pamex xwỹnhhta pix kukwak ri na mẽ pahpê pahtĩr tũm nê papa mã xwỹnh. Ja na mex o mry kamrô piitã hakrenh pa. ²⁴ Jejus Krisja pix kukwak ri. Tãm na pre patre pyrà nê mẽ pahto Tĩrtũm wỳr kaxyw mẽ ãhkra ho Tĩrtũm nhõrkwỹ kaàkre nhĩpêxta wỳr gjêx kêt nê. ãm ixkre kaàkre pix na pre. Na pre kaxkwa kamã Tĩrtũm nhõ krĩ hwỳr axà. Tã arĩ kamã Tĩrtũm nhĩhkô hã mẽ pahto hwỳr rãhã ho hkrĩ.

²⁵ Nê Ijaew nhõ patre maati na hte amgrà mẽ ôrkwỹ kaàkre kamã hitom maati hwỳr gjêx tipxi. Nê amnhĩ kôt mry kamrô ru nê ho agjê. Tĩrtũm kot hã omunh nê axte mẽ kot amnhĩ tomnuj mã hamaxpêr hkêt kaxyw. Nom Kris na pre mẽ uràk

nê mẽmo mry pa nê Tĩrtũm mã hkamrô kapĩr kêt nê. Kamrô na pre mẽ panê axkapĩ. Nom patre pyrà nê amgrà mẽ ã amnhĩ nhĩpêx anhỹr kêt nê. Na pre htyk o Tĩrtũm mã amnhĩ nhõr tipxi. ²⁶ Kêp apu patre pyrà nê amgrà mẽ mẽ panê htyk o pa ronhỹx ra mẽ panê htyk xohtô rax kumrêx. Nhỹx pre amnepê mã Tĩrtũm kot mẽmoj piitã ho katorta rũm amgrà mẽ mẽ panê htyk o pa ho hkrax. Jao xatã htyk o amgrà xohtô rax kumrêx. Nom ja kot anhỹr kêt. Na pre mẽ pahwỳr wrỳn nê mẽ panê htyk tipxi htã htykja o mẽ pahte amnhĩ tomnuj piitã hpãnhã amnhĩrer par kumrêx. Jakamã mo kaxyw koja axte ty?

²⁷ ãm pahtyk tipxi htã koja Tĩrtũm nhỹrmã akupỹm mẽ pahpiitã mẽ pahto pahtĩr nê ahpỹnhã tanhmã mẽ pajarênh to nê ahpỹnhã tanhmã mẽ panhĩpêx to. Kormã mẽ pahtĩr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. ²⁸ Ja pyrà nê na pre Krisja ãm mẽ panê htyk tipxi htã mẽ pahto ohtô nê mẽ panê mẽ pahte amnhĩ tomnuj piitã rênh pa. Hãmri nhũm Tĩrtũm akupỹm ho htĩr nê akupỹm amnhĩ wỳr ho api. Tã koja nhỹrmã akupỹn mẽ pahwỳr wrỳ. Nom axte mẽ pahte amnhĩ tomnuj pãnhã amnhĩ rer kaxyw mẽ panê htyk kaxyw wrỳk kêt nê. Ra kot mẽ pahte amnhĩ tomnuj pãnhã amnhĩrer kênã. Koja akupỹn wrỳn nê mẽ pahte amnhĩ wỳr kamã pajamak o papa xwýnhaja ma akupỹm amnhĩ kôt kaxkwa hwỳr mẽ pahto àpir pa. Ra mẽ pahtyk tã nhũm akupỹm mẽ pahto mẽ pahtĩr nê mã amnhĩ kôt mẽ pahto àpir pa pu mẽ kuri pamex nê pahtĩr tũm nê papa ho papa.

10

Kris kot mẽ panê htyk tipxi hã harênh

¹ Nê arĩ mẽ kot Tĩrtũm kapêr tũm kôt amnhĩ nhĩpêx o mẽ pa xwýnhjaja kormã hprĩ hã Tĩrtũm kot tanhmã mẽ pahto mex to hã harênh mar tỳx kêt. Na prem kormã hkwỹ pix ma. Na hte mẽ õ patreja amgrà mẽ kànhmã kaxkwa hwỳr mry kamrôta pẽ nê mẽ amnhĩ to Tĩrtũm wỳ. Kot ja hã mẽ omunh nê axte mẽ kot amnhĩ tomnuj mã hamaxpêr hkêt kaxyw. Tã ã mẽ kot amnhĩ nhĩpêx anhỹr tã arĩ Tĩrtũm kapêr kwỳm amnhĩ nhĩpêx rãhã ² jakamã na prem xatã kãm mẽmo mry kamrô runh o pa. Kêp apu tãm amnhĩ nhĩpêx nê tãm ri hamaxpêr ronhỹx arĩ ã amnhĩ nhĩpêx anhỹr o pa hkêt nê. Nê xatã amnhĩ pãnhã mry hpar nê hkamrô ho Tĩrtũm nhõrkwỹ kaàkre kamã mẽmoj kamĩr kêt nê. ³ Nom na prem tãm amnhĩ nhĩpêx o pa hkêt nê. Mẽ kot amgrà mẽ Tĩrtũm kot mẽ nê mẽ kot amnhĩ tomnuj rênh kaxyw mẽ kot kãm mẽmo mry hpar o pa htã no ãm hkôt amnhĩ nhĩpêx xwýnh ã amnhĩ jarênh kêt nê. Arĩ mẽ kot amnhĩ tomnuj o pa jakamã na prem mry hparta ã amnhĩ pumu nê tee ri amnhĩ kukamã hamaxpêr o hkaprĩ nê pa. ⁴ Nom na hte môx kamrô rỳ motre kamrôja mẽ panê mẽ pahte amnhĩ tomnuj rênh kêt nê. ⁵⁻⁸ Jakamã na pre Krisja mẽ pahwỳr nojarêt nê Tĩrtũm mã amnhĩ jarênh o: Pa Tĩrtũm? E kot paj ma mẽ hwỳr wrỳ.

Mẽ kot amnhĩ pãnhã amã mry hparta apê hprãm nōkati nê amã hkĩnh kêt.

Ate mẽ nê mẽ kot amnhĩ tomnuj rênh kaxyw mẽ kot amã mẽmo mry hparta amã hprãm kêt.

Ãm ixkukamã na ka pre ã mẽ kot amnhĩ nhĩpêx anhỹr kaxyw mẽ kãm ja hã karõ.

Mẽ kot mry nhĩpêx o te pa ixte mẽ nê ixtyk nê ixkamrô pikapĩr pyrãk o na prem ixkukamã ã amnhĩ nhĩpêx anẽ.

Jakamã na ka ra mẽ kaxyw inhmã inhĩ gõ pa mẽ urãk nê inhĩ ho inhĩ.

Tã kot paj ma mẽ hwỳr wrỳ. Ixte amã hprãm xà hkôt pix mã ixte tanhmã amã mnhi nhĩpêx to ho ixpa kaxyw. Akapẽr ã kagà htũm kot tanhmã ixkukamã ijarênh to xà hkôt kot wrỳ nê ã amã amnhĩ nhĩpêx anẽ. Anẽ.

Hãmri nê man mẽ pahwỳr wrỳ. ⁹ Kot Tĩrtũm kapẽr tũm o hapêx par nê hpãnhã tãm mẽ panê htyk kaxyw wrỳ. Jakamã na pre nojarêt nê Tĩrtũm mã amnhĩ jarênh o:

—E ixte amã hprãm xà hkôt amnhĩ nhĩpêx kaxyw kot paj ma mẽ hwỳr wrỳ.

¹⁰ Anhỹr jakamã wrỳ nê Tĩrtũm kãm hprãm xà hkôt mẽ panê ty. Na pre nhãm mēhõ mẽ kãm hkurê xwỳnhjê mã òr nhũm mẽ kot hpĩr nhũm amarĩ htyk kêt nê. Na pre amnhĩ grônh kôt mẽ kãm amnhĩ gõ nhũm prem kupĩ. Hãmri nhũm htyk o mẽ pahte hkôt amnhĩ xunhwỳr xwỳnhjê o Tĩrtũm kra. Mẽ kot xatã mry hparta rom htyk tipxi tã mẽ pahpiitã mẽ pahte amnhĩ tomnuj pãnhã amnhĩrer pa.

¹¹ Nê mẽ ò patrejaja na htem apkati mẽ Tĩrtũm nhõrkwy kaàkre kamã kãm tanhmã amnhĩ nhĩpêx to. Nê apkati mẽ hkwỳjê hpãnhã mry hkwỳ hpa nê hkamrô ru nê mẽ ho Tĩrtũm wỳ. Tã nom ja hã mẽ omunh xà hkôt mẽ nê mẽ kot amnhĩ tomnuj rênh kêt nê. ¹² No kêt Kris na pre mẽ kot xatã mry hpar xwỳnhhta rom ãm htyk tipxi htã mẽ pahte

amnhĩ tomnuj piitã hpãnhã amnhĩre. Hãmri nê ma akupỹm kaxkwa hwỳr api nê Tĩrtũm nhĩhkô hã Pahi Maati hkrĩ xà kamã upôk rũm hkrĩ ho hkrĩ. ¹³ Kojã kuri hkrĩ rãhã nhũm Tĩrtũmja ãhkram mẽ kot kutã amnhĩ xunhwỳr xwỳnhjê jaxàr pa. Ja kaxyw na kormã kuri hamãr o hkrĩ. ¹⁴ ãm htyk tipxi htã htykja o mẽ pahte hkôt amnhĩ xunhwỳr xwỳnhjê ho Tĩrtũm kra pu mẽ ra hpãnhã tãm amnhĩ nhĩpêx rãhã ho papa. Nê pajamxpêr mex o ri papa. Tĩrtũm kãm hprãm xà hkôt.

¹⁵ Amnepêm mẽ kot Tĩrtũm nhỹ hã kapêr jarênh o mẽ pa xwỳnhjaja na prem mẽ panhĩgêjtê mã kapêr o pa. Tĩrtũm Karô nhỹ hã mẽ kãm kapêr nê mẽ kãm:

¹⁶ —E na Tĩrtũm mẽ pamã amnhĩ jarê nê amnhĩ jarênh o:

Kot paj nhỹrmã axtem ixkapêr nyw o mẽ amã ixkapêr.

Nê mẽ akrãm hagjê ka mẽ mar tỳx pê hã ano htỳx nê ho apa.

Ixkapêr tũm na pa pre mẽ amã kên pota ã hã kagà. Nom ixkapêr nyw kot paj axtem mẽ akrãm hagjê.

¹⁷ Nê kot paj axte mẽ ate amnhĩ tomnuj mã ijamxpêr kêt nê.

Anhỹr o mẽ pamã amnhĩ jarênh. Anê.

¹⁸ Tã ra axte mẽ pahte amnhĩ tomnuj mã hamxpêr kêt ã kot amnhĩ jarênh jakamã mo kaxyw kot pu mẽ arĩ amnhĩ pãnhã kãm mẽmo mry hpar nê hkamrô runh o papa? Tã mẽ pahkwỳjaja na hte arĩ kãm ja ho anhỹr prãm o pa. E kwa mẽ axte ã amnhĩ nhĩpêx anhỹr kêt nê ixkwỳjaja.

Akupÿm mẽ pahte amnhĩ nhĩpêx tũm o paxujanâr kêt ã mẽ pamã karõ

Matêwre 27.51; Rukre 23.45; Rõmãn 5.1-2; Epes 3.12; Eprêw 4.14-16

¹⁹⁻²⁰ E ixkràmnhwÿjaja. Ra Jejus kot mẽ panê htyk o hkamrô pikapĩr jakamã na pu htem arĩ tee ri amnhĩ kukamã pajamaxpêr hkêr nê. Tĩrtũm axte kot mẽ pahte amnhĩ tomnuj mã hamaxpêr kêt jakamã na pu htem paxàmnhĩx amnhĩ to hwÿr o papa. Te paxàmnhĩx ôrkwÿ kaàkre kamã hitom maati hwÿr pagjêx nê kamã amnhĩ to hwÿrta pyræk. Jao ra mẽ papamjaja amnhĩ to hwÿr o papa nhũm patre axte mẽ pahto hwÿr kêt nê. Jejus na pre htyk o mẽ pamã hitom maati wÿr hakwakre kahêxà hã kupêxêja kôt ã ho axkjê. Jao mẽ paxàmnhĩx hwÿr mẽ pagjêx kaxyw mẽ pamã kahê xà mẽ. ²¹ Tã ra kêp Tĩrtũm nhõ krĩ kamã mẽ pahto hwÿr xwÿnh maati na. Nê mex kumrêx o jar pika ja kamã patre kot mẽ ho hwÿr o pa xwÿnh ta jakrenh. ²² Jakamã e kwa kêr pu mẽ mãmri paxàmnhĩx amnhĩ to Tĩrtũm wÿr o papa. Ra Jejus kot mẽ panê htyk nhũm mẽ pahte amnhĩ kaxyw hkôt pajamaxpêr rãhã ho papa jakamã kêr pu mẽ axte mẽ pahpê amnhĩ tomnuj xwÿnh ã amnhĩ jarênh kêt nê. Kêr pu mẽ nhÿrmã tanhmã pajamaxpêr punuj to rÿ tanhmã amnhĩ tomnuj to hãmri nê tee ri ja hã amnhĩ pumu nê pahkapri kamã amnhĩ to Tĩrtũm wÿr kurê kumrêx. Jejus ra kot mẽ pahte amnhĩ tomnuj pãnhã amnhĩrer par jakamã kot puj mẽ Tĩrtũm mã tanhmã mẽ pahte amnhĩ tomnuj to hã amnhĩ jarê nhũm mẽ pama nê axte kãm hamaxpêr kêt nê. Pu mẽ te paxwÿr nê pahte amnhĩ nê pagrã htyk kuhõnh par nê akupÿm

pamex pyrâk. Nê axte paxàmnhĩx amnhĩ to Tĩrtũm wỳr o papa.

²³ Nê mẽ kot Kris ã tanhmã mẽ pahto htã kwa kêr pu mẽ tee ri amnhĩ kukamã pajamaxpêr kêt nê. Rỳ pajamaxpêr o:

—Konên. Koja mẽ tanhmã hamaxpêr to nê Kris ã ixpĩ rỳ ko. Pa apu mẽ kot ixpĩr pymaj akupỹm ixte amnhĩ nhĩpêx tũm o awjanã nê akupỹm hkôt amnhĩ nhĩpêx japêr rỳ ko. Anê.

Kwa pu mẽ tee ri ã pajamaxpêr anhỳr hkêt nê. Pu kêt mẽ pajamaxpêr o:

—Nà mẽ kot Kris ã tanhmã ixto htã kot paj aa hkaga hkêt nê. Mẽ kot hã ixpĩr mã tã kot paj hkaga hkêt kumrêx.

Anhỳr ã amnhĩ jarê. ²⁴ Nê kêr ka mẽ akwỳjê mã anê kê mẽ mẽmoj to axpên kutã nojarêr rãhã ho ri axpên kôt pa. Jao tanhmã axpên to mex to o ri axpên kôt pa.

²⁵ Na pre ra mẽ pahkwỳjaja tanhmã hamaxpêr to nê axte mẽ pahkôt pikuprõnh nê Tĩrtũm kapêr mar o hkrĩ hkêt nê. Nô kêr pu mẽ ho mẽ uràk kêt nê. Kêr pu mẽ arĩ xatã axpên wỳr akuprõ nê mẽ pahte tee ri amnhĩ kukamã pajamaxpêr nê axpên mã pakapêr o papa. Kêt mẽ panhõ Pahihtija ra akupỹn mẽ pahwỳr wrỳk kaxyw jakamã kwa kêr pu mẽ kutêp arĩ axpên mã pajamaxpêr mex nhõr pê tãm axpên nhĩpêx mex rãhã ho i papa.

²⁶ Mẽ pahkwỳjaja kot Tĩrtũm kapêr mar mex tã na htem kuma nê ãm kuma. Kwa kêr ka mẽ ho mẽ uràk kêt nê. Kris kot mẽ panê htyk ã harênhja mẽ kot mar mex tã na htem kuma nê ãm kuma nê hkaga kumrêx. Jakamã mēhõ koja Kris pyrã nê htyk o mẽ kot amnhĩ tomnuj pãnhã amnhĩre?

Nà amrakati kumrêx. ãm Jejus pix na pre Tĩrtũm ja kaxyw ãm. Tapxipix na pre ã mẽ panê amnhĩ nhĩpêx anê. Tã nhũm mẽ kot hkagaja mỳrapê koja mẽ nhỹrmã mẽ tãmjaja mẽ kot amnhĩ tomnuj pãnhã amnhĩre. ²⁷ Mẽ kot Tĩrtũm kutã amnhĩ xunhwỳr xwỳnh na mẽ. Amnepê m na pre Tĩrtũm mẽ kot kutã amnhĩ xunhwỳr xwỳnhjê kaxyw mẽ kot amnhĩ xà htỳx kamã hamak tũm xàta nhĩpêx. Tã ra mẽ kot Jejus kaga jakamã koja nhỹrmã ma hwỳr mẽ rênh pa nhũm mẽ tee ri kãm hwỳr pa hprãm kêt kaprỳ. ²⁸ Amnepê finat Mojesja kormã htĩr ri na pre hte mẽhõ pixi nê kapêr kaga nê akupỹm kot amnhĩ nhĩpêx tũm o awjanã nê tanhmã amnhĩ tomnuj to nhũm hkwyjaja ja hã omu. Tanhmãn axkrut rỳ axkrunêpxi nê ja hã omu. Hãmri nê ma Mojes wỳr mra nê axpên kôt kãm tanhmã kot amnhĩ tomnuj to hã harê. Hãmri nhũm harênh ma nê mẽ kãm hã amỹnê nhũm tee ri kãm htĩr prãm kaprỳ. Mẽ kot akupỹm amnhĩ nhĩpêx tũm o ujanãr nê amnhĩ tomnuj o paja mỳrapê na prem mẽ kupa. ã na pre htem mẽ hipêx anhỹr o pa.

²⁹ Nê koja mẽhõ tanhmã Tĩrtũm Kra Jejus o kapêr punuj to. Tĩrtũm kapêr ã kagà htũm kot ra mẽ kot kêp Tĩrtũm Kra hã harênh mar mex tã axtem nê tanhmã ho kapêr punuj to ho pa. Kot mẽ panê htyk nê hkamrô pikapĩr kôt kot mẽ pahte amnhĩ tomnuj pãnhã amnhĩrer ã harênh mar tã kuma nê ãm kuma nê harênh o:

—Nà mẽ pahpyrà nê kot amnhĩ tomnuj xwỳnh nhũm mẽ kot hã hpĩr kênã. Na pre mẽ panê htyk kêt nê.

Anhỹr ã harê. Nê Tĩrtũm Karõja nhũm mãânên tanhmã ho kapêr punuj to. Kêp mẽ pakutã nojarê

xwýnh tâ nhũm axtem nê tanhmã ho kapêr punuj to. Mýrapê koja nhýrmã Tĩrtũm tanhmã homnuj tỳx to. Homnuj tỳx o mẽ kot Mojes kapêr kaga nhũm mýrapê kot mẽ hparta jakre. Jakamã kwa kêr ka mẽ ã amnhĩ nhĩpêx anhỹr hkêr nê. ³⁰ Tĩrtũm kapêr ã kagà htũm kot ja jarênh kot:

Ixpê Tĩrtũm kot paj mẽ kot amnhĩ tomnuj xwýnhjê homnuj tỳx nê. Anê.

Nê mẽ kot tãm amnhĩ nhĩpêx xwýnhjê jarênh kot:

Mẽ kot amnhĩ to mex o mẽ pa xwýnhjaja kot paj nhýrmã mẽ ho mex rax nê. No mẽ kot amnhĩ tomnuj o mẽ pa xwýnhjaja kot paj nhýrmã mẽ homnuj tỳx nê. Anê.

Ra mẽ pahte ã kapêr anhỹr xwýnhja kot amnhĩ nhĩpêx ã omunh mex. ³¹ Jakamã kwa mẽ okora. Kêr ka mẽ amnhĩ to mex rãhã ho ri apa. Tĩrtũm rãhã ho rãhã nê hihtỳx o hihtỳx jakamã koja mẽmoj tâ akamã gryk ka amex kêr o amex kêr.

³² Nê amnepê m mẽ ate Jejus kôt amnhĩ xunhwýr krax kãm na prem Jejus ã mẽ atomnuj tỳx tâ ka prem mẽ umaj hkaga hkêr nê. Tã kêr ka mẽ arĩ ã amnhĩ nhĩpêx anhỹrja kukamã mãn ajamaxpêr nê hã anohtỳx rãhã ho apa. Jao arĩ ã amnhĩ nhĩpêx anê nê mẽ umaj Jejus kaga hkêr nê. ³³ Na prem mẽ piitã mẽ noo mã tanhmã mẽ amã kapêr punuj to nê tanhmã mẽ anhĩpêx to. Nê tũhã tanhmã mẽ akwýjê homnuj tỳx to ka mẽ tee ri ja hã mẽ omu nê mẽ kamã axukaprĩ nê. Nê mẽ hkôt axkamẽ nhũm prem mã mẽ ato anê nê. ³⁴ Na prem mẽ akwýjê jagiê ka prem ja hã mẽ omu nê ma mẽ hagjênh xà hã ixkre hwýr mẽ hwýr mra nê tanhmã mẽ ho mex to. Nhũm prem mẽ apê mẽ akukrêx kwýptà

nê ma amnhĩm o pa ka mẽ ãm amnhĩ tã mẽ omu nê ajamxpêr o:

—Kwār mẽ māmri ma amnhĩm hamỳn o pa. Koja nhỹrmã Tĩrtũm inhmã ixkukrêx mex o kot ja jakrenhta kwỳ nhõr rax nê pa amnhĩm hamỳ nhũm aa ixpê hapêx kêt nê. Hãmri nhũm axte mēhõ aa ixpê utàr kêt nê. Jar mẽ ixkukrêxta mexti hã. Anê.

Jao mẽ kot mẽ apê utàr tã ka mẽ akapri nã apa hkêt nê. ã amnhĩ kukamã ajamxpêr anhỹr pê akĩnh nê apa. ãm hãmri na ka prem ã amnhĩ kukamã ajamxpêr anê. ³⁵ Na ka prem mẽ kutã amnhĩ to htỳx kãm ã apa anê. Tã kwa kêt ka mẽ arĩ ã amnhĩ nhĩpêx anhỹr o ri apa. Kêr kê nhỹrmã Tĩrtũm ja hã mẽ ato mex rax nê.

³⁶ Nê kêr ka mẽ arĩ amnhĩ kaxyw Tĩrtũm mã ajamxpêr rãhã ho ri apa. Mẽ kot Jesus ã tanhmã mẽ ato htã ka mẽ hkaga hkêt nê. Kot kaj mẽ ã amnhĩ nhĩpêx anhỹr o apa nhũm Tĩrtũm ja hã mẽ apumu nhũm ja kãm mex nê. Hãmri nhũm ra kot amnhĩ jarênh xà hkôt nhỹrmã amã mẽmoj mex nhõr rax nê. Jakamã kwa mẽ kot tanhmã mẽ anhĩpêx to hã amnhĩ pumu nê tee ri amnhĩ kukamã ajamxpêr o ri akapri hkêt nê. Kot kaj mẽ Kris ã apunuj rãhã apa hkêt nê. ³⁷ Tĩrtũm kapêr ã kagã htũm kot Jesus jarênh kot:

Koja mẽ pahwỳr wrỳk mã xwỳnhhta tokyx wrỳ. Na ra wrỳk kaxyw nojarê. Anê.

³⁸ Nê harênh kot:

Ixkôt mẽ kot amnhĩ nhĩpêx mex o mẽ pa xwỳnhhaja koja mẽ amnhĩ kaxyw ixkôt hamaxpêr tỳx rãhã nê. Jao nhỹrmã ixri htĩr tũm nê mex rãhã nê pa ho pa.

Nê koja mēhō ixkaga pa tee ri kām ixkīnh kêt ã omu. Anē.

³⁹ No mē papajaja te mē pahte mē kot Jejus kaga nhūm kot amnhī tā mē homnuj mā xwýnhjê pyrāk kêt. Arī mē pahte amnhī kaxyw hkôt pajamaxpēr rāhā jakamā koja nhỹrmā amnhī wýr mē pahto api.

11

Amnhī kaxyw Tirtūm kôt mē hamaxpēr mex xwýnhjê jarēnh

Sikūn Pêtre 3.5-7

¹ Nê na htem Kris ã mē panhīpêx kati ho pa pu mē pahpunuj rāhā nê ri papa. Te Kris kot mē pahto mex kêt pyrāk pu htem mēmoj punuj pix kām ri papa nê kormā Tirtūm kot mē pahto mex ã amnhī tā omunh kêt nê. Tā ã mē pahte anhỹr tā kwa kêr pu mē arī kapêr kôt amnhī nhīpêx rāhā ho papa. Mē pahte pano ho Tirtūm pumunh kêt tā kot mē pahkôt pa ho pa hā amnhī kaxyw kām pajamaxpēr tỳx rāhā ho papa. Jakamā na pu htem âm kapêr kôt pix mā amnhī nhīpêx o papa. ² Amnepê mā mē pakukamā mē panhīgêjtaja na prem no ho Tirtūm pumunh kêt tā amnhī kaxyw kām hamaxpēr nê kapêr kôt amnhī nhīpêx o pa nhūm amnhī tā mē omu nhūm ja kām mex nê.

³ Nê mē papajaja na pu htem pajaxwýja mē pano ho omunh kêt tā amnhīm harēnh o:

—Nā amnepêm kormā mēmoj piitā amrakati ri nhūm Tirtūm âm kapêr pix o mēmoj piitā ho kato. Ixte inhno ho ja hā omunh kêt tā kot ã amnhī nhīpêx anhỹr ã amnhī jarēnhja jakamā kot paj hkôt ijamaxpēr tỳx rāhā ho ri ixpa. Anē.

⁴ Na pre finat Atâw nhîpêx nê kaxyw hprô Ewa nhîpêx. Hâmri nhûm wa hkra Apewja htô Kaï rom amnhî kaxyw Tîrtûm kôt hamaxpêr tỳx o pa. Jakamã nhûm wa Tîrtûm mã mêmôj gô. Nhûm Apew kot Kaï rom Tîrtûm kãm hprãm xà hkôt kãm mêmôj nhôr jakamã nhûm amnhî tã omu nê kot amnhî to mex xwỳnh ã harê nê kot kãm ôr xwỳnh ta nhûm mex ã harê. Tã Apew amnepêm htyk tã pu htem arĩ harênh mar rãhã ho papa nê kãm pajamaxpêr o:

—Apew na pre hte amnhî kaxyw Tîrtûm kôt hamaxpêr tỳx rãhã ho pa.

Anhỹr ã kãm pajamaxpêr.

⁵ Nê Atâw kanrêhã htâmnhwỳ Enokja na pre haxwỳja amnhî kaxyw Tîrtûm mã hamaxpêr tỳx o pa. Jao hkamnàr rom kãm hprãm xà hkôt pix mã tanhmã kãm amnhî nhîpêx to ho pa nhûm amnhî tã omu nê amnhîm mex ã harê. Jakamã na pre htyk kêt nê. Na pre Tîrtûm htĩr rãhã ma amnhî wỳr ho api nhûm hkwyjaja tee ri hapêr o pa. Jakamã na pu htem arĩ axpên mã Enok kot amnhî kaxyw Tîrtûm kôt hamaxpêr mex o pa hã harênh o papa.

⁶ Mẽ kot amnhî kaxyw Tîrtûm mã mẽ hamaxpêr kêt xwỳnhjaja na hte Tîrtûm mẽ mex ã mẽ harênh kêt nê. Tã mẽ papajaja kêr pu mẽ Enok pyrà nê amnhî kaxyw kãm pajamaxpêr tỳx rãhã ho papa. Nê pajamaxpêr o:

—Tîrtûmja htĩr rãhã ho rãhã. Kojã nhỹrmã mẽ ixte amnhî kaxyw hkôt ijamaxpêr xwỳnhjê ho mex rax nê. Nà kojã mẽ ixto anê.

Anhỹr o mẽ pajamaxpêr nhûm Tîrtûm amnhî tã mẽ pajamaxpêr ã mẽ pahpumu nê mẽ pahte amnhî to mex ã mẽ pajarê. No mẽ kot amnhî

kaxyw kãm hamaxpêr kêr xwýnhaja na hte ã mẽ harênh anhÿr kêr nê.

⁷ Nê Enok kanrêhã htàmnhwý Noehtija na pre haxwýja amnhĩ kaxyw Tĩrtũm mã hamaxpêr tÿx o pa. Jao hkamnàr rom amnhĩm pàr raxja nhĩpêx. Na pre ra Tĩrtũm na rax kukamã tanhmã kãm ujarênh to. Kormã aa na wrÿk nhũm Noehti kot omunh kêr tã Tĩrtũm kapêr ma nê mar xà hkôt amnhĩm pàr rax kumrêxta nhĩpêx. Ôrkwý kamã hkwyjê mẽ mẽ amnhĩm hipêx. No mẽ kot Tĩrtũm kapêr mar nê ãm mar xwýnhaja na pre Tĩrtũm gô tam o mẽ hanhi nê mẽ himex pa. Nom Noehtija nhũm kot amnhĩ to mex xwýnh ã harê. Kot amnhĩ kaxyw hkôt hamaxpêr rãhã ho pa jakamã nhũm pre ã mex ã harênh anê.

⁸ Nê Noehti kanrêhã htàmnhwý Apraãwja na pre haxwýja amnhĩ kaxyw Tĩrtũm mã hamaxpêr tÿx o pa. Na pre Tĩrtũm kot kãm pika nhôr ã kãm amnhĩ jarê nê ra kot ma hwýr mênh kaxyw. Hãmri nhũm Apraãw kuma nê hkamnàr rom ô pika kaga nê ma pika hõja wýr pa. Aa kot ma hwýr môr nê omunh kêr tã Tĩrtũm kapêr mar xà hkôt ô pika kaga nê ma hwýr pa ho pa. ⁹ Hãmri nê hwýr pøj nê omu nhũm Tĩrtũm kãm:

—E pika ja kot paj nhÿrmã akanrêhã akra nê atàmnhwýjê mã kugõ. Anê.

Hãmri nhũm kuma nê pikaja kamã pa ho pa. Ra kamã axtem mẽ uro hkwyjaja ri pa nhũm Tĩrtũm kormã mẽ kator kêr ri nhũm mẽ ô pika hwýr pøj nê mẽ kamã pa ho pa. Nom amnhĩm ôrkwý mex nhĩpêx kêr nê. Kormã kêp ô pika kumrêx kêr ã hkamnhĩx jakamã ãm mry kà o ixkre nhĩpêx nê kamã pa ho pa. Nê nhÿhÿm pa kaxyw nê kugrà

nê ma amnhî kôt o pa. Amnhî kaxyw Tîrtûm mã hamaxpêr rãhã jakamã ã amnhî nhîpêx anhÿr o pa.

Nê Apraãw kra Ijak nê htàmnhwÿ Jakoja wa Apraãw pyrã nê mry kà ho ôrkwÿ nê ma amnhî kôt o pa. Nhũm Tîrtûm kot Apraãw mã kapêr pyrã nê wa kãm wa hkanrêhã wa hkra nê wa htàmnhwÿjê mã pika nhôr ã amnhî kukamã wa kãm amnhî jarê. ¹⁰ Jakamã nhũm Apraãw kormã Tîrtûm nhô krî hwÿr àpir xa hã amnhî tã hamâr pê kot ho ô pika mã xwÿnhjê kamã pa ho pa. Kaxkwa hwÿr àpir mã xwÿnhhta mex kumrêx. Tîrtûm kot hipêx jakamã koja mry kà ho ixkre nhîpêxta rom aa hapêx kêt nê. Jakamã nhũm Apraãw mẽ pahpyrã nê ma kot hwÿr àpir xa hã amnhî tã Tîrtûm jamâr rãhã ho pa. ¹¹⁻¹² Tã ra hpigêt tÿx nê hkurê hkêt nê pa. Te ra ri htyk kaxyw pa pyrãk. Nhũm hprô Sara haxwÿja hpigêx tÿx nê. Kamrô hkêt ã amgrã xohtô rax kumrêx. Nhũm wa aa hkra hkêt nê pa htã nhũm Tîrtûm nhÿrmã wa hkra hã wa kãm awjarê nhũm wa kuma nê amnhî kaxyw hkôt hamaxpêr kurê kumrêx. Nom amnhî tã kuma nê tee ri amnhî kukamã hamaxpêr hkêt nê. Na pre wa kuma nê axpên mã:

—Nà kot puj xep hãmri tã pahkra. Tîrtûm kot hã ã pajarênh anhÿr kênã. Anê.

Tã ã wa kot hkra kaxyw Tîrtûm mã hamaxpêr anhÿr jakamã na pre Apraãwja hprô htu. Ra wa hamê hpigêt tÿx kumrêx tã nhũm htu. Nhũm wa hkra Ijakja gaa nê wa kãm kato. Jakamã nhũm wa gaa nê rî wa hkanrêhã wa htàmnhwÿ xohtô rax o ohtô rax. Ohtô ho kaxkwa kamã kanhêti xohtô jakre. Nê ohtô ho gô xujanâr mÿri pikahti grã

hkryre jakre. Jakamã nhũm mẽ tee ri mẽ ho kôta hpar mã. Nhũm Apraãw kêp mẽ hpàr krax. ¹³ Tã nhũm Apraãw nê Ijak nê Jakoja mẽ ri pa tãmtã nê htyk pa nê hapêx. Tĩrtũm kormã kot mẽ kãm pika jarênh̄ta nhõr xwỳj ri ra htyk pa. Nom kormã mẽ htĩr ri tanhmã kãm hamaxpêr to nê hamaxpêr o:

—Nà kormã Tĩrtũm kot mẽ inhmã pika jarênh̄ja nhõr kêt tã koja nhỹrmã inhmỹr pê ixkanrêhã ixkra nê ixtàmnhwỳjê mã kugõ. Nà koja mẽ kãm kugõ. Ra kot hã inhmã amnhĩ jarênh̄ kênã kot kêt mẽ kãm òr kêt.

Anhỹr o kaxyw kãm hamaxpêr rãhã ho pa. Jao hkĩnh nê hamaxpêr o:

—Nà inhõ krĩja axtem na. Na pa hte jar pika ja kamã ri mẽ hkôt ri ixpa. Te ixpê mẽ uro pyrã nê ri mẽ hkôt ixpa nom jar inhõ krĩ hkêt. Inhõ krĩ na kêt axte mã. Anê.

¹⁴⁻¹⁵ Na prem ã ò krĩ hõ hkukamã hamaxpêr anhỹr o pa. No ò krĩ htũmta mẽ kot hkaga nê pika hõ hwỳr mõi xwỳnh̄ta na prem ã harênh̄ anhỹr kêt nê. Kop apu mẽ kot amnhĩm tãm mãn jarênh̄ ronhỹx prem awjanã nê ma akupỹm hwỳr pa. Na prem axtem krĩ hõ jarê nê kormã hwỳr mõi kêt ã amnhĩ jarênh̄ o pa. ¹⁶ Tã nhỹ krĩ na prem ã harênh̄ anê? Nà kaxkwa kamã Tĩrtũm nhõ krĩja. Tãm na mex kumrêx jakamã nhũm prem kormã hwỳr ma àpir xa hã mẽ pahpyrã nê amnhĩ tã Tĩrtũm jamãr rãhã ho pa nhũm amnhĩ tã mẽ omu nê hkĩnh nê. Nê mẽ kot tãm amnhĩ nhĩpêx ã mẽ omu nê mẽ kêp hkra hã mẽ harênh̄ ã hpijaàm kêt nê. Hãmri nê mẽ kutêp tanhmã ò krĩ ho mex to ho pa.

¹⁷⁻¹⁸ Na pre ra tanhmã Apraãw mã hkra Ijakja jarênh̄ to nê kãm:

—Akra Ijak kanrêhã hkra nê htàmnhwýjaja koja mē kêp ixkra. Anê.

Tã ra kot amnhĩ tã Apraãw kamã hamak kaxyw hkukamã hamaxpêr nê hamaxpêr o:

—Xà we Apraãw kãm ixkĩnh tỳx kumrêx nê kãm ixkôt amnhĩ nhĩpêx rãhã ho pa hprãm nà? Xà we kãm ixkĩnh tỳx o hkrata jakrenh? E pa kop we ja hã amnhĩ tã kamã ama nê omu măn. Anê.

Hãmri nê kot hkra hpĩr nê kãm ôr ã kãm karô. Hãmri nhũm kuma nê ra kot kãm hpĩr kaxyw. Kot Tĩrtũm kot amnhĩ nhĩpêx ã omunh mex jakamã hkamnàr rom kot kãm hpĩr kaxyw.

¹⁹ Nê hamaxpêr o:

—Nà Tĩrtũm akupỹm kot mē ho htĩr xwýnh kênã.

Anhỹr jakamã kãm hkra hpĩr pyma hkêt nê ra kot kãm hpĩr mã tã nhũm Tĩrtũm amnhĩ tã omu nê nê kãm kapêr nhũm kuma nê hpĩr kêt nê wa ma akupỹm ôrkwỹ hwýr mō. Tã ã kot hkra nhĩpêx anhỹr jakamã Apraãw mã te Ijak htyk nê akupỹm htĩr pyràk.

²⁰ Nê Ijakja na pre haxwýja amnhĩ kaxyw Tĩrtũm mã hamaxpêr tỳx o pa. Jao hkamnàr rom amnhĩ kra wa kãm Tĩrtũm kot wa ho mex kukamã wa kãm harê. Kra Jako mē Ejauta wa kãm harê nê wa kãm:

—E koja nhỹrmã Tĩrtũm inhmýr pê war ato mex rãhã ho pa. Anê.

²¹ Nê Jakoja na pre haxwýja amnhĩ kaxyw Tĩrtũm mã hamaxpêr tỳx o pa. Jao hkamnàr rom hkra Juje mã Tĩrtũm kot mē ho mex kukamã harê. Na pre Jakoja hkra nê htàmnhwý mē hpimràatã hprãm xàj ma Ejit wýr pa nê kamã pa ho pa. Tã nhũm Jako hpigêt tỳx nê ra htyk kaxyw. Hãmri nê hkra Juje mē hkra wa mē kãm kapêr nê mē kãm:

—E na pa tee amnhĩ kamã ama. Na pa ra ixtyk kaxyw. Nom koja Tĩrtũm nhĩrmã inhmȳr pê mẽ ato mex rax nẽ. Anẽ.

Hãmri nẽ amnhĩ kaxpar xà hã pĩ hã amnhĩ kaxpa nẽ kãnhmã xa nẽ Tĩrtũm mã mex o mex ã harẽ. Hãmri nẽ akupȳm nõi xà kamã nõn ty.

²² Nẽ Jujeja na pre haxwȳja amnhĩ kaxyw Tĩrtũm mã hamaxpêr tȳx o pa. Jao htyk kaxyw nẽ hkamnâr rom hkwȳjê mã tanhmã amnhĩ jarẽnh to. Ra hpigêt nẽ htyk kaxyw nẽ hkwȳjê mã tanhmã amnhĩ tã karõ hto nẽ mẽ kãm:

—E na pa ra ixtyk kaxyw. Tã koja Tĩrtũm inhmȳr pê nhĩrmã Ejit rũm mẽ akator nẽ ma akupȳm mẽ panhõ pika hwȳr mẽ ato pa. Ra kot mẽ panhĩgêt Apraãw mã amnhĩ jarẽnh xà hkõt. Jakamã kwa mẽ inhma. Kêr ka mẽ akupȳm anojarêt nẽ ma amnhĩ kõt ixtã kasãwja mȳ nẽ amnhĩ kõt ixto mõi. Hãmri nẽ mũtar mẽ panhõ pika kamã mẽ anhõ krĩ htã ijaxà pa jawȳ mẽ akuri ixtã pyka. Anẽ.

²³ Nẽ Mojes katorxà mẽ hipêêxàja na pre wa haxwȳja jajê pyrà nẽ amnhĩ kaxyw Tĩrtũm mã hamaxpêr tȳx o pa. Juje hkanrêhã htãmnhwȳ na pre wa. Jakamã nhũm Ejit nhõ pahija tee ri Ijaew xohtô rax kumrêx ã mẽ omu nhũm ja kêp omnuj nẽ. Hãmri nhũm mẽ hkra myjaja mẽ hapôx kõt mẽ hamȳnh xwȳnhjaja kot mẽ hpar ã mẽ kãm karõ. Tã nhũm Mojes kato nhũm hipêêxà mẽ katorxàja wa omu nhũm muxre nhũm wa tee ri hkukamã hamaxpêr. Hãmri nẽ pahĩ Paraohiti mã mẽ hkra jamȳnh xwȳnh kot wa kêp hpĩr pymaj ho pimxur o hã mytwrȳ axkrunêpxi. Tĩrtũm kamnâr rom wa amnhĩ tã kãm uma hkêt nẽ ã kêp hkra ho hpimxur anẽ.

²⁴ Nê Mojes na pre haxwỳja amnhĩ kaxyw Tĩrtũm mã hamaxpěr tỳx o pa. Kormã karàre ri na pre Paraohti hkra nija omu nê amnhĩm kumỳ nê ho hkra nê amnhĩ kôt o pa. Rãhã nhũm àptàr nhũm Ejit nhõ xwỳnhjaja kệp pahi Paraohti htàmnhwỳ hã axpẽn mã harẽ. Hãmri nhũm tee ri amnhĩ tã mẽ kuma nê amnhĩ tã mẽ kãm aprã nê mẽ kãm:

—Kwa mẽ ã ijarẽnh anhỹr kêt nê. Ixpê mẽ akwỳ hkêt. Anẽ.

²⁵ ãm kãm Tĩrtũm kwỳjê kôt pix mã ri pa ho pa hprãm. Nê kãm Ejit nhõ pahi hkôt amnhĩ tomnuj prãm kêt nê. ãm mẽ kot amnhĩ tomnuj pix o paja na mẽ kãm hprãm nhũm ja hã mẽ omu nê tee ri mẽ hkukamã hamaxpěr nê hamaxpěr o:

—Nà kot paj mẽ hkôt ri ixpa hkêt kumrẽx. Mẽ hkĩnh nê pa htã koja mẽ gaa nê ty nhũm mẽ hkĩnhja mẽ kệp hapêx. Nà kot paj Tĩrtũm kwỳjê hkôt măn ri ixpa ho ixpa. Mẽ kot Tĩrtũm ã mẽ inhĩpêx kati htã pa arĩ mẽ hkôt ixpa ho ixpa. ²⁶ Inhmã Ejit nhõ xwỳnhjê hkôt ixkukrẽx rax nê ri ixpa hprãm kêt. Kwār mẽ mãmri Tĩrtũm ã tanhmã inhĩpêx to. Koja mẽ ã inhĩpêx anẽ pa ixpunuj nê ri ixpa htã koja Tĩrtũm nhỹrmã ixto mex rax nê. Nà kot paj Ejit nhõ pahihtia hkôt ri ixpa hkêt nê.

Anhỹr jao ra mẽ pahpyrà nê Kris gryk ã mẽ hkaga. ²⁷ Tã akupỹm mẽõ pika hwỳr Ijaewjê ho mõi kaxyw nhũm Ejit nhõ pahihtija tee ri ja hã omu nê kamã gryk tỳx nê. No nhũm Mojesja amnhĩ kaxyw Tĩrtũm kôt hamaxpěr tỳx o hkamnàr rom kãm mẽ uma hkêt nê. Nê mẽ kệp hkwỳjê kator pa nê ma akupỹm mẽõ pika hwỳr amnhĩ kôt mẽ o pa. Tĩrtũm kamnàr rom ã mẽ kệp mẽ ho kator anẽ. Aa kot no ho omunh kêt tã amnhĩ kaxyw

kām hamaxpêr tỳx nê hkamnâr rom mē kator nê hamakêtkati nê mē o pa. ²⁸ Nê hkamnâr rom mē hkĩnh ã arĩgro mē kot kām “Pas” anhỹr xwỳnh̄ta ho hkrax. Kormã Ejit rûm kator kêt ri. Nê kaxyw amnhĩ kwỳjê mã hã karõ nê mē kām:

—E pa mē amã Tĩrtũm kapêr jarê ka mē inh̄ma. Nà kot puj xep mē jarãhã ôwêhti hkwy pa nê hkamrô ru. Nê hkamrô ho panhôrkwỹ jakwakre hã pĩ kukõ. Hãmri nê ĩ kuxõt nê kuku. Koja kamàt nhũm mē kot amnhĩ tomnuj xwỳnh̄jê pē mē hkra my kot wa piitã mē hpar mã xwỳnh̄ja mō. Hãmri nê mē pamỳ ri mō nê ã mē pahte mē panhôrkwỹ nhĩpêx anhỹrja ã omu nê tanhmã mē pahkrajê ho hkêt nê. Tĩrtũmja ã mē pahte amnhĩ nhĩpêx anhỹr kaxyw ã inh̄mã karõ anê. Jakamã e pu mē hkamnâr rom ã amnhĩ nhĩpêx anê kê mē pahkrajaja mē pahpê htyk kêt nê. Anê.

Hãmri nê ã mē kot Ejit rûm kator xã hã arĩgrota ã mē hkĩnh o kator krax anê. Mē hkĩnhja na htem kām “Pas” anê.

²⁹ Nê Ijaewjaja na prem haxwỳja Ejit rûm kormã Mojes kôt mē pa ri uràk nê amnhĩ kaxyw Tĩrtũm mã hamaxpêr. Jakamã na prem ra gô xujanâr pē “Gô Kamrêk” anhỹr xwỳnh̄ja mỳ ri kuhê nhũm Tĩrtũm mē kām ho axkjê. Nê mē kām hkôt ã ho amgrà nhũm mē hã hkamnâr rom mex nê rêr pa. No nhũm mē hkôt mē kot mē himex kaxyw mē mrar xwỳnh̄jaja. Ejit nhõ pōristijaja nhũm gōja akupỹm mē hã axkamur nê mē himex pa.

³⁰⁻³¹ Nê Ijaew kot Mojes mỳr pē Jojue hkôt pa ri mē uràk nê amnhĩ kaxyw Tĩrtũm kôt hamaxpêr o pa. Na prem ra Tĩrtũm kot mē kām pika nhõr xwỳnh̄ta wỳr pōj nhũm Tĩrtũm krĩ pē Jeriko hwỳr

mê kurê. Mê kot kamã mê pa xwýnh pê utàr kaxyw mê hwýr mê kurê. Mêõ krĩ pu hã kahêja kên tỳx pix o na pre. Nê hprêk rax kumrêx. Nê krĩ nhõ xwýnhjaja kãm Tĩrtũm kapêr mar prãm kêt. Hãmri nhũm Tĩrtũm mê hã Ijaewjê mã amýnê nê mê kãm:

—E mêõ krĩja kot paj mê amã kugõ nom kêr ka mê inhmar kumrêx. Kêr ka mê apkati mê mê õ krĩ hwýr mra nê kupu hpýnh o atã apkati kêp 7 nê rĩ ma akupým mra. Anê.

Hãmri nhũm mê kuma nê mar xà hkôt ma Jeriko hwýr mra. Hãmri nê hwýr pøj nê Tĩrtũm kamnàr rom krĩ puhã kahêja kupu hpýnh o hã apkati kêp 7. Hãmri nhũm apkati pê 7ta ã nhũm kên tỳx o kahêja mê kêp amnhĩ krakrak nê rôrôk pa. Nhũm mê mra nê hkôt krĩ hwýr agjê nê krĩ nhõ xwýnhjê nhĩmex pa. Nom krĩ kamã kuprý pê Raapja Ijaew pyrã nê amnhĩ kaxyw Tĩrtũm mã hamaxpêr o pa jakamã nhũm mê kormã mê himex kaxyw mê hwýr mõi kêt ri amnhĩ kukamã mê hkwýjaja kot mê hã ukapi ho pa kaxyw mê hwýr mê kurê. Hãmri nhũm Raapja mê kêp amnhĩ pyrã nê Tĩrtũm kôt hamaxpêr ã mê omu nê hkwý kot mê himex pymaj amnhĩ nhõrkwý kamã mê kêp mê ho amũxu nhũm mê hkà hkĩnh pê ma akupým hkwýjê wýr mõi. Jakamã nhũm mê kot mê himex kaxyw mê hwýr mra hãmri nê amnhĩ pyrã nê tanhmã Raap mê õ fãmii ho hkêt nhũm mê arĩ htĩr nê pa. Mê uràk nê amnhĩ kaxyw Tĩrtũm kôt hamaxpêr o pa hã omunh xà hkôt tanhmã mê ho hkêt nê.

³² ã na pre mê kot amnhĩ kaxyw Tĩrtũm kôt mê hamaxpêr xwýnhjaja Tĩrtũm kamnàr rom amnhĩ nhĩpêx anhýr o pa. Nom jajê pixjaja na prem ã amnhĩ nhĩpêx anhýr hkêt nê. Mãânên Giteãw nê

Parak nê Săsô nê Jepte nê Tawi nê Sāmuew nê Tĩrtũm nhỹ hã mẽ kapêr o pa xwỳnhjaja. Jajê piitã na prem wamtajê pyrà nê amnhĩ kaxyw Tĩrtũm kôt hamaxpêr tỳx rãhã ho pa. Nom kot paj ixprĩ hã tanhmã mẽ kot hkamnàr rom amnhĩ nhĩpêx to hã mẽ harênh kêt nê. Kot pa anê nê tokyx harênh par kêt nê. Mẽ ohtô rax kumrêx jakamã na pa âm hkwỳ pix jarê nê hã kagà.

³³ Na prem hkwỳjaja Tĩrtũm kamnàr rom ma mẽ kot amnhĩ tomnuj xwỳnhjê nhõ krĩ hwỳr mra nê mẽ kêp mẽ ô pika pytà. Nê mẽ hkwỳjaja Tĩrtũm kamnàr rom mẽ ho amnhĩptàr mex o pa. Nhũm prem kãm Tĩrtũm kurê xwỳnhjaja mẽ hkwỳjê pynê nê ahkrehti kamã mry xoprê hkwỳ nhĩpy mẽ kurê. Nhũm prem amnhĩ tã mẽ omu nê amnhĩ kaxyw Tĩrtũm mã hamaxpêr kurê kumrêx nhũm amnhĩ tã mẽ omu mẽ nê te mry jakwa ho pikamỳr tỳx pyràk o mẽ hipêx nhũm âm mẽ omunh o kuhê nê tanhmã mẽ ho hkêt nê. ã na prem Tĩrtũm kamnàr rom amnhĩ nhĩpêx anhỹr o pa.

³⁴ Nhũm mẽ kot kuwy rax kãm mẽ hkwỳjê rênh tã nhũm mẽ kot amnhĩ kaxyw Tĩrtũm mã hamaxpêr tỳx nhũm amnhĩ tã mẽ omu nê mẽ nê tanhmã kuwy ho nhũm mẽ hxêk kêt nê. Nhũm pre mẽ hkwỳjaja wapo ho mẽ hkamnhwỳr o mẽ hkwỳjê hpar kaxyw nhũm mẽ amnhĩ kaxyw Tĩrtũm mã hamaxpêr nhũm amnhĩ tã mẽ omu nê mẽ nê tanhmã mẽ ho nhũm mẽ amnhĩ rê nê mẽ umaj hprôt nê ma mra. Mẽ hihtỳx kêt tã Tĩrtũm kamnàr rom ỹ hã hihtỳx nê mẽ kãm mẽ hkurê xwỳnhjê ho krihkrit pa nhũm mẽ ma akupỹm hapêx.

³⁵ Nê mẽni hkwỳjaja na prem haxwỳja amnhĩ

kaxyw Tîrtûm mã hamaxpêr tỳx o pa. Jao mẽ hkra-jaja mẽ kêp htyk tâ nhũm prem Tîrtûm kamnàr rom mẽ ho kuwỳ nhũm mẽ kuma nê akupỹm mẽ kãm mẽ ho htĩr.

À na prem amnhĩ kaxyw Tîrtûm mã hamaxpêr pê mex nê pa anê. No na pre mẽ hkwỳjaja mẽ uràk nê amnhĩ kaxyw kãm hamaxpêr tỳx tâ nhũm Tîrtûm tokyx mẽ ho mex kêt nê. Na pre mẽ kãm mẽ hkurê xwỳnhjaja Tîrtûm ã mẽ par kaxyw. Nê mẽ hkwỳjaja Tîrtûm ã mẽ hipêx kati ho pa nhũm mẽ amnhĩ xà htỳx kãm hamak kãm ty. Nhũm mẽ himex kaxyw nê mẽ kãm:

—Kwa mẽ Tîrtûm kaga. Kot kaj mẽ hkaga pa mẽ amã inhũre nê mẽ anhĩmex kêt nê. Anê.

No nhũm mẽ kuma nê ãm mẽ kuma nê amnhĩ kaxyw kãm hamaxpêr tỳx pê mẽ kãm:

—Nà mẽ kam nê mãmrĩ ixpĩ. Inhmã ixtyk pyma hkêr. Kot paj ty nhũm Tîrtûm akupỹm ixtò ixtĩr pa kuri inhĩmex kumrêx nê ri ixtĩr tũm nê ixpa ho ixpa.

Anhỹr o mẽ kãm amnhĩ jarênh jakamã hãmri Tîrtûm kaga hkêr rãhã nhũm mẽ himex.

³⁶ Nê mẽ kãm mẽ hkurê xwỳnhjaja na prem Kris ã mẽ hkwỳjê mã hpêr o pikênh pê mẽ htaç xà ho mẽ htaç rũnh o pa. Nê kàx o mẽ hkwỳjê hpa hpre nê mẽ hte hpre nhũm mẽ kêp prês nê hkrĩ ho hkrĩ.

³⁷⁻³⁸ Nhũm prem kên rũnh o mẽ hkwỳjê htaç o mẽ kupa. Nê mẽ hayr o mẽ hkwỳjê pa. Nê mẽ hkamnhwỳr o mẽ hkwỳjê pa. ã na prem Kris kôr mẽ hamaxpêr ã mẽ omunh xà hkôr mẽ hipêx anhỹr o pa. Jakamã na pre mẽ hkwỳjaja mẽ umaj mẽõ krĩ rũm hapôj nê ma hprôt nê mra. Nê te mẽ õ krĩ hkêr pyrà nê kapôt ã kêp amrakati nê ri pa. Mẽ

ê hkêť nê ôwêhti hkà ho ê nê ri hã pa. Nê motre kà ho amnhĩ pre nê ri hã pa. Nê kên prêk ã api nê kre kamã hpimxur o pa. Nê pika hkre kamã hpimxur o pa. Nhũm mẽ kãm mẽ hkurê xwỳnhjaja te mẽ kêp ahpunu nê mẽ kêp ahkro pyràk o mẽ hipêx nê axpên mã mẽ harênh o:

—Nà mẽ mexti hã. Kwa pu mẽ piitã mẽ himex paa ri.

Anhỹr o mẽ harênh tã nhũm Tĩrtũm mẽ uràk nê ã mẽ harênh anhỹr kêt nê. Na pre mẽ mex kumrêx ã mẽ harê. Nê nhỹrmã kuri mẽ mex nê pa ho pa hkukamã mẽ harê.

³⁹ ã na prem Tĩrtũm kamnàr rom mẽ kãm mẽ hkurê xwỳnhjê kutã amnhĩ to htỳx kãm htyk o pa anê. Nhũm Tĩrtũm ja hã mẽ omu nê hkĩnh nê kãm mẽ hapê htỳx nê. No nhũm mẽ kormã htĩr ri amnhĩm Tĩrtũm kot mẽ ho mex xà jamỳnh kêt rãhã ty. ⁴⁰ Tã mo na pre Tĩrtũm kormã mẽ htĩr ri hkwỳjê pyrà nê mẽ ho mex kêt nê? Nà na pre kormã mẽ hkukamã hamaxpêr o:

—Nà kot paj kormã mẽ ho mex kêt nê. Kot pa mẽ mỳr pê mẽ kot ixkôt amnhĩ xunhwỳr mã xwỳnhjê jamãr grire mãn. Kêr pa inhõ krĩ kamã mẽ ho ixpimrààtã mẽ ho mex rax kumrêx. Nà kot paj ã mẽ ho mex anê. Ja na kêt inhmã mex o kormã mẽ htĩr ri ixte mẽ ho mexta jakrenh. Anê.

Jao ra ã mẽ papajaja mẽ pakukamã hamaxpêr anê.

12

*Mẽ pahte Jejus pyrà nê mẽmoj kutã amnhĩ to htỳx
ã mẽ pamã karõ
Piripos 3.12-21*

¹ Na pre mẽ pakukamã mẽ panhîgêt kwỳjaja amnhĩ kaxyw Tĩrtũm mã hamaxpêr pê ã amnhĩ xà htỳx kamã hamak o pa anê. Tã te ra mẽ kot kỳj rũm kaxkwa rũm mẽ pahpumunh nê tanhmã mẽ pamã kapêr to pyrà nê mẽ pamã kapêr o:

—E mẽ inhma mẽ ixkanrêhã mẽ ixtàmnhwỳjaja. Na pa prem ã Tĩrtũm kamnàr rom amnhĩ nhĩpêx o ixpa anê. Mẽ kot ja hã mẽ inhĩpêx kati htã pa prem Jesus kaga hkêt nê. Tã kêr ka mẽ ixpyrà nê ã mẽ kãm mẽ akurê xwỳnhjê kutã amnhĩ to htỳx anê. Nê mẽ ixpyrà nê amnhĩ kaxyw Tĩrtũm kôt pix mã ajamaxpêr tỳx rãhã ho ri apa. Anê.

Jakamã kwa kêr pu mẽ uràk nê ã amnhĩ nhĩpêx anhỹr rãhã ho măn ri papa. Te mẽ hprôt xwỳnhjaja kot amnhĩ nhĩpêx pyràk o amnhĩ nhĩpêx. Na htem hprôt tỳx kaxyw mẽmoj pytĩ jamỳnh nê ho hprôt hkêt nê. Na htem ỹ kamã hprôt o hprôt tỳx nê wam hkwỳjê mã wa nê mra. Ja pyrà nê kêr pu mẽ pahte Tĩrtũm kapêr kôt amnhĩ nhĩpêx mex o papa kaxyw tanhmã mẽ pahte amnhĩ tomnuj to hã amnhĩ pumu nê hkaga kurê kumrêx. Mẽ pahte amnhĩ tomnuj o papa xàja te mex pyràk no ãm mex kêt. Te ho mẽ hprôt xwỳnh kot axtem nê mẽmoj pytĩ mỳnh nê tee ri ho hprôt tỳxta pyràk. Kot puj mẽ tanhmã amnhĩ tomnuj to ho papa nê Tĩrtũm kapêr kôt amnhĩ nhĩpêx mex kêt nê. Jakamã kwa kêr pu mẽ Tĩrtũm kapêr gryk ã amnhĩ tomnuj nê amnhĩ to htỳx rãhã ho papa. Te ho mẽ hprôt nê nhỹri mẽ àhuk xà pix kukamã hamaxpêr rãhã hprôt tỳx xwỳnhhta pyrà nê ãm Jesus mã pajamaxpêr tỳx rãhã ho papa.

² E kot paj mẽ amã Jesus kot tanhmã mẽ panê amnhĩ nhĩpêx toja jarê ka mẽ inhma. Nà kot

mê panê mê pahte amnhĩ tomnuj pãnhã amnhĩrer kaxyw htyk nhũm mê pahte hkôt amnhĩ xunhwÿr jakamã na hte mê pamã pajamaxpêr nyw gô pu mê amnhĩ kaxyw hkôt pajamaxpêr ho ri papa. Na pre mê kãm hkurê xwÿnhjaja kot pĩ kahpa hã nhôr nê hpĩr mã nhũm mê kutã mê kãm amnhĩ to htÿx nê arĩ mê kãm xa nhũm prem kupĩ. Tã tee ri amnhĩ kukamã hamaxpêr o Tĩrtũm kaga hkêr nê. Na pre hamaxpêr o:

—Nà kwār mê māmrĩ ixpĩ. Kot paj ty nhũm Inhĩpêxà akupÿm ixto ixtĩr pa kuri inhmex kumrêx nê ixtĩr tũm nê ixpa ho ixpa. Anê.

Tã na ra kaxkwa kamã Tĩrtũm xupôk rũm mex nê hkrĩ ho hkrĩ. ³ Jakamã kwa kêr pu mê kot ã mê panê amnhĩ nhĩpêx anhÿrja mã pajamaxpêr rãhã ho ri papa. Mê kot hipêx kati htã nhũm mê kutã amnhĩ to htÿx nê xa. Tã kêr pu mê urak nê mê kãm mê pahkurê xwÿnhjê kutã amnhĩ to htÿx rãhã ri papa. Jao tee ri amnhĩ kukamã pajamaxpêr o mê umaj Tĩrtũm kaga hkêr nê.

⁴ Na ka htem ma mê kot amnhĩ tomnuj xwÿnhjê hwÿr mra nê mê kot amnhĩ tomnuj kaga kaxyw tanhmã mê kãm akapêr to nhũm mê ja hã mê ama nhũm ja mê kêp omnuj nhũm mê amnhĩ tã tanhmã mê atomnuj to. Nom wam mê kot mê pahkwÿjê nhĩpêxta pyrà nê kormã mê atôxpĩr kêr nê.

*Tĩrtũm kot tanhmã hkrajê nhĩpêx to hã harênh
Juãw 15.1-2; Eprêw 5.7-8; Xiakre 1.2-4*

⁵ Nê măn ka mê arĩ Tĩrtũm kapêr ã kagã htũm kwÿ hã ano htÿx japêr. Mê pahpê Tĩrtũm krajê mã kapêr jarênh kot:

Koja Pahi Maati tanhmã mẽ ate amnhĩ tomnuj to nê mẽ amã kapêr ka mẽ ama nê mar tỳx nê mẽmojta kaga kurê kumrêx. No mẽ ama nê tee ri kot nê akurê xwỳnh̃ta kukamã ajamaxpêr o ri akaprĩ o axtem nê Tĩrtũm kaga hkễt nê. Ama nê kot amã mẽmoj nê kapêr xwỳnh̃ta kaga kurê kumrêx.

⁶ Na hte Tĩrtũm kãm mẽ pajapê hã tanhmã mẽ pahte amnhĩ tomnuj to hã mẽ pahpumu nê hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh̃ jakamã na hte ã mẽ pahte tãm amnhĩ nhĩpêx o papa kaxyw mẽ panhĩpêx anê. Anê.

⁷ Jakamã kot kaj mẽ tanhmã amnhĩ tomnuj toja mỳrapê tanhmã apunuj kute nê ri apa htã no ãm tee ri amnhĩ kukamã ajamaxpêr hkễt nê. Kễt mẽ ãm ajamaxpêr o:

—Nà ixte tãm amnhĩ nhĩpêx kaxyw na Tĩrtũm ã inhĩpêx anê. Ixpê hkra hã ixte amnhĩ to mex o ixpa prãm xà̃ ã inhĩpêx anê.

Anhỹr o măn kêt ajamaxpêr. Na hte mẽ hipêêxà mẽ hkra kot amnhĩ to mex kaxyw ã mẽ hipêx anê. Tã Tĩrtũm na hte mẽ uràk nê ã mẽ panhĩpêx anê.

⁸ No koja mēhō hkra kot tanhmã amnhĩ tomnuj to hã omu nê ãm omu nê hã tanhmã ho hkễt nê. Hã koja hkraja te hipêêxà hkễt nê hã awrãre nê ri pa pyràk. Tã mẽ pahpê Tĩrtũm krajaja kot puj mẽ tanhmã amnhĩ tomnuj to nhũm ja hã mẽ pahpumu nê hã tanhmã mẽ pahto. Nom mẽ kêp hkra hkễt xwỳnh̃jaja nhũm hte ja hã mẽ omu nê ãm hã mẽ omu nê hã kormã tanhmã mẽ hipêx to hkễt nê.

⁹ Nê na hte mẽ panhĩpêêxà mẽmoj tâ mẽ pamã karõ pu htem kuma nê hkôt amnhĩ nhĩpêx. Ja mex. Nom kaxkwa kamã Mẽpahpãm maatija mẽ pahte mar nê hkôt amnhĩ nhĩpêxja na kêt mex kumrêx. Kot puj mẽ ã amnhĩ nhĩpêx anê nê nhỹrmã kuri pamex nê pahtĩr tũm nê papa ho papa.

¹⁰ Nê mẽhprĩre na htem hamaakro nhũm mẽ hipêêxà tanhmã hã mẽ ho. Hã mẽ hkaprêprêk rỹ hã mẽ kãm akir. Amnhĩ krã hkôt tanhmã mẽ hipêx to. Mẽ kot ja hã amnhĩ pumunh nê axte hkêt kaxyw. Ja mex. Tã mẽ papajaja. Mẽ pahpê Tĩrtũm kra na pu htem tũhã tanhmã amnhĩ tomnuj to nhũm mẽ pahpumu nê tanhmã hã mẽ pahto. Mẽ pahte amnhĩ pumunh nê axte hkêt kaxyw. Urak nê amnhĩ to mex pix o papa kaxyw.

¹¹ Na hte mẽmoj tâ tanhmã mẽ panhĩpêx to pu mẽ tee ri amnhĩ pumu nê pahkaprĩ nê pahkĩnh kêt nê ri papa. Nom kot puj mẽ tokyx tanhmã amnhĩ tomnuj tota kaga nê akupỹm Tĩrtũm kôt tãm amnhĩ nhĩpêx o papa nê akupỹm pahkĩnh nê pajamakêtkati nê ri papa.

Mẽ pahte Tĩrtũm kaga hkêt ã mẽ pamã karõ

¹² Jakamã e kwa kêr ka mẽ amnhĩ to htỳx nê apa. Mẽ kot Kris ã tanhmã mẽ anhĩpêx to htãã. ãm Tĩrtũm kôt pix mã amnhĩ nhĩpêx mex pê akĩnh nê apa. ¹³ Kêr kê Kris kôt atõjê hũ tee ri mẽmoj tâ amnhĩ pumunh kôt ra Tĩrtũm kaga kaxyw tâ ã mẽ ate amnhĩ nhĩpêx anhỹr ã mẽ apumu nê mẽ apyrà nê akupỹm hkôt amnhĩ xãm tỳx nê hkaga hkêt nê.

¹⁴ Nê kêr ka mẽ tãm ri axpên nhĩpêx o ri apa. Jao axpên kôt ajamakêtkati nê ri apa nê amnhĩ to mex pix kukamã ajamaxpêr. No kot kaj mẽ anhỹr kêt

nê nhÿrmã mẽ panhõ Pahi Maati hwÿr axàpir nê kuri amex nê apa hkêr nê.

¹⁵ Na hte Tîrtûm mẽ pahto mex nê mẽmoj to mẽ pakutã nojarêt rãhã o pa. Jakamã kwa kêr ka mẽ hkaga hkêr nê. Nê tanhmã ri ajamaxpêr punuj to ho ri apa hkêr nê. Kot ka mẽ ã amnhĩ nhĩpêx anê nhũm Kris kôt mẽ pahkwÿjaja ja hã mẽ apumu nê mẽ apyrã nê tanhmã amnhĩ tomnuj.

¹⁶ Nê kêr ka mẽ axpên kãm apijaàm kêt o ri apa hkêr nê. Nê te finat Ejau kot amnhĩ nhĩpêx pyrãk o ri apa hkêr nê. Na pre Tîrtûm ã hpijaàm kêt nê hkwyjê kamã hpijaàm kêt o pa. Nê Tîrtûm mã hamaxpêr kêt kumrêx. Kêp Ijak kra kot wa jakamã koja nhÿrmã hipêêxà mÿr pê kêp hikukrêx nê ò pika piitã ho àrĩk pa. Hãmri nhũm hipêêxà kot ho Tîrtûm wÿr nhũm kot ho mex kaxyw mã tã nhũm axtem nê mẽmo arĩgro hã kãm prãm xaj kot kêp mẽmoj to àrĩk mã xwÿnhata htõ Jako mã hkaga hpa. Mankwÿtre gôj kãm ãm prãm xaj kãm hkaga hpa. Jakamã nhũm Jako hpãnhã te kêp Ijak kra kot wa pyrã nê mÿr pê ò mẽmoj piitã ho àrĩk mã.

¹⁷ Gaa nhũm Ejau tee ri ã amnhĩ nhĩpêx anhÿrja mã hamaxpêr o hkaprĩ nê. Nê tee ri kãm Jako kot akupÿm kãm mẽmojta nhõr prãm kaprÿ. Nê mur nê hã hipêêxà wÿ no nhũm axte kãm mẽmoj nhõr kêt nê. Nhũm kot ho Tîrtûm wÿr kaxyw tee ri amnhĩ to kuwÿ no nhũm kuma nê ãm kuma nê kãm ho anhÿr kêt nê.

¹⁸ Nê amnepê mã Tîrtûm kot mẽ panhĩgêxjê mã kapêr kaxyw na prem hixêt prêk pê Sinai jarênhja wÿr akuprõ nê hparpê kuhê. Hãmri nhũm hixêt nhĩmõk ã kuwy hpòk rax kumrêx. Nê kuwy mÿr ri kakrã htyk ajêt. Nê kòk àpêr tÿx nê. Nhũm

Ijaewjaja hixêt krax ã omu nê kãm maa ho htertet o kuhê. ¹⁹⁻²¹ Hãmri nhũm mēhō pifti kakō nhũm Tĩrtũm hixêt nê mē kãm kapēr nê mē kãm:

—E mē inhma. Kêr ka mē hixêt ã axàpir kêt nê. Kot kaj mē atō hã api rỳ mē akrit ò hã api ka mē ja hã omu nê kaxyw kên rũnh kwỳ jamỳ nê ho htak o apĩ. Anê.

Hãmri nhũm mē piitã tee ri kuma nê kãm ma htỳx kumrêx nê amnhĩ nê kãm:

—Kwa hãmri Tĩrtũm. Axte mē inhmã mēmoj jarênh kêt nê. Mojes pix mã măn mē ixkaxyw tanhmã kãm akapēr to. Anê.

Jakamã nhũm Mojes Tĩrtũm mã amnhĩ jarênh nê kapēr mar kaxyw hixêtja ã api. Kãm ma nê htertet rãhã mō nê hã api. ²² Nom mē kãm ma ho Tĩrtũm mã amnhĩ jarênh tã mē papajaja na pu htem mē kurom paxàmnhĩx kãm amnhĩ jarênh o papa. Na pu htem kãm amnhĩ jarênh kaxyw nê hixêt prêk ã paxàpir kêt nê. Te ra mē pahte ma kaxkwa hwỳr ò krĩ hwỳr paxàpir nê pano ho omunh pê kãm amnhĩ jarênh pyræk. Ò krĩja mex o mex. Kamã kapēr o mē wrỳk xwỳnhjaja ohtô o ohtô. Na htem kamã hkĩnh rãhã ho pa ho pa.

²³ Nê ò krĩ hwỳr na hte hkra xàpir xwỳnhjaja ri pa. Nê mē papajaja na pu htem kãm amnhĩ jarênh kaxyw nê te kaxkwa kamã kuri pakuhê nê kãm amnhĩ jarênh pyræk o amnhĩ nhĩpêx. Te mē pahpê hkra kot wa pyræk jakamã mē pamã uma hkêt. Nhũm pre Tĩrtũm ra ò kagà kamã mē pakutêp amnhĩm mē panhĩxi hã kagà hpa. Na hte mēmoj piitã hamār o hkrĩ. Nê krĩja kamã amnepêm kormã Kris kot mē pahwỳr wrỳk kêt ri nhũm ra

amnhĩ kaxyw Tĩrtũm kôt hamaxpêr mex xwỳnhjaja haxwỳja ra kamã ri pa. Ra Tĩrtũm kot mẽ ho hkra jakamã nhũm mẽ kuri ri pa ho pa. ²⁴ Nê Jejus haxwỳja kamã pa ho pa. Na pre mẽ panê htyk nê hkamrô pikapĩrja o mẽ pahte amnhĩ tomnuj pãnhã amnhĩre. Jakamã na pu htem hkôt amnhĩ xunhwỳ nhũm mẽ pahto hkra pu mẽ paxàmnhĩx ri Tĩrtũm mã amnhĩ jarênh nê amnhĩ to hwỳr o papa.

Amnepêm na pre Tĩrtũm tee ri Kaĩ kot htô Apew pĩr nê hkamrô pikapĩrja ã omu nê hamaxpêr o:

—Nà ã kot amnhĩ nhĩpêx anhỹr jakamã kot paj hã homnuj tỳx nê. Anê.

Tã ra hpãnhã Jejus kot mẽ panê htyk nê hkamrô pikapĩrja ã omu nê ra axtem hamaxpêr o:

—Nà ãm hãmri na Ixkraja mẽ nê ty. Jakamã mẽ kot hkôt amnhĩ xunhwỳr xwỳnhjaja kot pa Ixkra kukwak ri mẽ kot amnhĩ tomnuj mỳrapê tanhmã mẽ ho hkêr nê.

Anhỹr o mẽ pakukamã hamaxpêr. ã hamaxpêr anhỹrja mex o mex.

²⁵ Na pre Mojes Tĩrtũm nhỹ hã mẽ panhĩgêxjê mã xatã mẽ kãm Tĩrtũm kapêr jarênh o ri pa nhũm mẽ kuma nê hkôt amnhĩ nhĩpêx o pa. Tã gaa nê ra hã nohkêr pa nê akupỹm mẽ kot amnhĩ nhĩpêx tũm o awjanã nhũm Tĩrtũm tee ri ja hã mẽ omu nê mỳrapê tanhmã mẽ hipêx to. Tã nhũm Kraja kaxkwa rũm mẽ pahwỳr wrỳ nê mẽ pamã kapêr. Jakamã kwa mẽ okora kêr pu mẽ panhĩgêjtjê pyrà nê mẽ pahte amnhĩ nhĩpêx tũm o paxujanãr kêt nê. Kot puj mẽ anê nhũm Tĩrtũm ja hã mẽ pahpumu nê mẽ urak nê ja hã tanhmã mẽ panhĩpêx to.

²⁶ Amnepêm Tĩrtũm kot hixêr prêk pê Sinai kamã mẽ kãm kapêrja. Na pre kapêr tỳx o pika ho àk

nhũm htertet tỳx nê. Tã koja nhỹrmã axte pika ho àk nê kaxkwa ho àk nhũm wa hamẽ htertet tỳx kumrêx. Koja axte ho anhỹr ho pixi nê axte ho anhỹr kêt nê. ²⁷ Tã nhỹrmã axte mẽmoj to àk ã amnhĩ jarênh jakamã koja mẽmoj to kator xwỳnh ta piitã ho àk. Nê mẽ pahte panhĩhkra ho mẽmoj nhĩpêx xwỳnhja nhũm ho àk nhũm htertet tỳx kãm hpigrành pa nê hapêx. Nhũm mẽmoj htertet nê hpigrành kêt xwỳnh pixjaja arĩ rãhã ho rãhã. ²⁸ No Tĩrtũm nhõ krĩ koja htertet nê hapêx kêt nê. Nê mẽ papajaja mẽ pahpê hkra jakamã te ra kuri ò krĩ kamã ri mẽ papa pyràk. Jakamã kot puj mẽ mẽ uràk nê pajapêx kêt nê. Jakamã e kwa kër pu mẽ amnhĩ tã Tĩrtũm mã mex o mex ã harênh nê hã pahpijaàm rãhã ho papa. Nê tanhmã amnhĩ tom-nuj to hã amnhĩ pumu nê Tĩrtũm pumaj mẽmojta kaga kurê kumrêx. ã mẽ pahte amnhĩ nhĩpêx anhỹr o papaja na Tĩrtũm kãm hprãm. ²⁹ Hihtỳx o hihtỳx jakamã koja mẽmoj tã akamã gryk kot kaj amex kêt o amex kêt.

13

Mẽ pahte Tĩrtũm kãm hprãm xà hkôt amnhĩ nhĩpêx ã mẽ pamã karõ

Rômãn 12.1-2; Epes 4.1-3; Korosẽ 1.10-11; Wam Tesarõn 4.1-12; Wam Pêtre 2.11-12; Wam Juãw 3.17-18

¹ Nê e kwa Kris kôt ixtõ nê ixtõxjaja. Kër pu mẽ arĩ Kris kôt pahkwỳjê ho mex o măn axpẽn kôt ri papa. Nê kër pu mẽ tanhmã pahpunuj to hã amnhĩ pumunh tã axpẽn to mex mã panhũrer kêt nê. ã axpẽn nhĩpêx anhỹr rãhã ho papa.

² Nê amnepê mã na pre mẽmojaja nhỹhỹnh mra nê mẽ panhĩgêjtê hõ hwỳr pøj. Hãmri nhũm mẽ omu nê htỳx axtem krĩ hõ nhõ xwỳnh ã mẽ hkamnhĩx tâ no nhũm mẽ kêp Tĩrtũm kapêr o mẽ wrỳk xwỳnh kwỳ na prem. Hãmri nhũm amnhĩ nhõrkwỹ hwỳr mẽ kuwỳ nhũm mẽ ma hkôt mra nê kuri pøj nê kutã apku. Jakamã kwa koja nhỹhỹnh krĩ hõ rũm mẽmojaja ma mẽ awỳr mõi ka mẽ omu nê axàmnhĩx amnhĩ nhõrkwỹ hwỳr mẽ hwỳr kurê kumrêx kê mẽ ari pøj. ã mẽ hipêx anhỹr o apa hãmri nê nhỹrmã mẽ panhĩgêjtja pyrã nê amnhĩ wỳr Tĩrtũm kapêr o mẽ wrỳk xwỳnhjê hõ hwỳr japêr. Mẽ uràk nê ja hã mẽ omunh kêt tâ atỳx amnhĩ wỳr mẽ awỳ nhũm ja mẽ amã mex o mex.

³ Nê kêr ka mẽ ra mẽ kot Jejus ã mẽ akwỳjê pynênh nê mẽ hagjênh xwỳnhjê mã ajamaxpêr rãhã ho ri apa nê mẽ ho ajamakêtkati hkêt nê. Te mẽ kajaja mẽ ãhko hã mẽ hagjênh xà kamã apunuj nê akrĩ pyrãk o mẽ kãm ajamaxpêr o ri apa. Jao mẽ kamã axukapĩ ho mẽ hwỳr mra nê mẽ kãm mẽmoj nhõr o ri apa.

⁴ Nê mẽ kot axpên to hprõja na mex. Nom kêr ka mẽ amyjaja ãm aprõ pix tãnopxar o ri apa. Nê mẽ anijaja mẽ ajaxwỳja amjên pix tãnopxar o ri apa. No mẽ hkuprỳjê hwỳr mẽ mrar xwỳnhjaja nê nhãm mẽ kêp mẽ hprõ ho amnhĩkati xwỳnhjaja nê nhãm mẽ kêp mẽ mjên o amnhĩkati xwỳnhjaja koja Tĩrtũm ja hã mẽ omu nê mẽ homnuj tỳx kumrêx.

⁵⁻⁶ Nê kêr ka mẽ akàxpore rũnh kêt ã amnhĩ pumu nê tee ri amnhĩ kukamã ajamaxpêr o akapĩ hkêt nê. Na pre Tĩrtũm mẽ pamã kapêr o:

Kot paj akôt ri ixpa rãhã ho ixpa nê aa arer rý
akaga hkêt kumrêx.

Anhÿr jakamã kot kaj mẽ akàxpore grire htã akaprĩ
nê apa hkêt nê. Aa Tĩrtũm kot mẽ pahkaga hkêt
ã amnhĩ jarênh jakamã mẽmoj kot pu wem omu
nê pamã nhãm ri mẽ uma ho papa? Tĩrtũm kot
mẽ pahkôt pa ho pa kênã. Jakamã na pu htem
pajamaxpêr o:

Nà Pahi Maatija ra kot ixkôt pa ho pa xwýnh
jakamã mẽmo kot pa hkêt ri inhmã uma ho
ixpa?

Mẽmo kot kêt ri tanhmã kêp ixto?

Anhÿr o pajamaxpêr o papa. ⁷ Nê mẽ kot Kris mã
mẽ ajamãr o mẽ pa xwýnh ra mẽ htyk xwýnhjaja ka
mẽ arĩ mẽ kot tanhmã amnhĩ nhĩpêx to ho paja mã
ajamaxpêr rãhã ho ri apa. Na prem Tĩrtũm kapêr
o mẽ ajahkre mex nê. Nê tãm ri amnhĩ nhĩpêx o
ri mẽ akôt pa. Nê amnhĩ kaxyw Tĩrtũm kôt pix mã
hamaxpêr rãhã ty. Tã kêr ka mẽ uràk nê ã amnhĩ
nhĩpêx anhÿr o ri apa rãhã ty.

⁸ Nê Jejus Krisja arĩ rãhãã. Nê amnepê mã kot
amnhĩ nhĩpêxja mããnên arĩ rãhãã. Aa kot amnhĩ
nhĩpêxja nhĩjuk ri axtem tanhmã amnhĩ nhĩpêx to
hkêt.

⁹ Nê kwa kêr ka mẽ Tĩrtũm kôt amnhĩ nhĩpêx
rãhã ho ri apa. Na hte kapêr o hêx xwýnhjaja mẽ
awÿr mra nê mẽ amã:

—Amnepêm mẽ ate Tĩrtũm kot mẽ amex ã mẽ
ajarênh kaxyw mẽ ate kãm mẽmo mry nhôr nê
akupÿm hamýnh nê hkur o apa htã ra ja ho anhÿr
kaga. Kwa mẽ ja ho awjanã nê axte ã amnhĩ
nhĩpêx anhÿr o ri apa. Kê Tĩrtũm ja hã mẽ
apumunh kôt mẽ amex ã mẽ ajarê.

Anhÿr o mẽ amã kapêr. Nom xà na hte Tĩrtũm ã mẽ pahte amnhĩ nhĩpêx anhÿr ã mẽ pahpumunh kôt mẽ pamex ã mẽ pajarê? Xà na htem mẽmo mẽ apkur xà hkur pê amnhĩ kaxyw Jejus kôt hamaxpêr tỳx o pa? Nà na htem anhÿr kêt nê. Na pu htem mẽmoj kur kôt pamã Tĩrtũm kĩnh kêt nê. Kêt mẽ paxàpkur xàja mẽ panhĩ pix o hihtỳx kaxyw na. Na hte Jejus kôt mẽ pahto paxihtỳx kêt nê. ãm Tĩrtũm kot amarĩ kãm mẽ pajapê nê mẽmoj to mẽ pakutã nojarêr jakamã na pu htem ja hã amnhĩ pumu nê amnhĩ kaxyw hkôt pajamaxpêr tỳx o papa.

¹⁰ Tĩrtũmja Jejus kot mẽ panê htyk ã omunh xà hkôt ra kot mẽ pamex ã mẽ pajarênh jakamã mo kaxyw kot pu mẽ axte kot mẽ pamex ã mẽ pajarênh kaxyw kãm mẽmo mry gô nê hkwy hku? Koja mēhō akupỹm Tĩrtũm kapêr tũm o ujanār jao Jejus kot nê htyk nê hkamrô pikapĩrja kaga.

¹¹ Amnepêm na pre patre maatijaja tōhã mẽ kãm mẽmo mry hpar xwỹnh hkamrô ru nê guhkrax kãm kuru nê hamỳ nê ma o mra nê Tĩrtũm nhōrkwỹ kaàkre hwỳr hitom maati hwỳr ho agjê. Tĩrtũm kot mẽ omunh nê axte mẽ kot amnhĩ tomnuj mã hamaxpêr kêt kaxyw. Hāmri nhũm hpānhã ĩ mỳ nê krĩ pê ho kato nê ma o mra nê nhỹri amỹm hkwyjê hkàx ã ho hxêr pa. Tĩrtũm kapêr tũm kôt na prem ã amnhĩ nhĩpêx anhÿr o pa. ¹² Tã ja pyrã nê na prem ma krĩ pê amỹm Jejus o tẽ nê kupĩ nhũm hkamrô axkapĩ. Kot mẽ pahte amnhĩ tomnuj pānhã amnhĩrer nê mẽ pahto mẽ pahpê Tĩrtũm kra kaxyw ã htyk nê hkamrô pikapĩr anê.

¹³ Na prem Tĩrtũm kapêr tũm gryk ã Jejus kaga nê

pôristijê mã anê nhũm mẽ ma krĩ pê ho kato nê o tẽ nê kupĩ. Tã kêr pu mẽ jajê rom Jejus gryk ã măn Tĩrtũm kapêr tũm kaga. Kwār mẽ māmri Jejus pyrà nê Tĩrtũm ã tanhmã mẽ pahto nê amnhĩ nê nhỹhỹm mẽ pajano. ¹⁴ Kêr jar mẽ papapxàja kêp mẽ papapxà kumrêx kêr. Nê jar mẽ panhõ krĩja kêp mẽ panhõ krĩ kumrêx kêr. Mẽ pamã te kot pô nhĩrõnh o ixkre pix pyræk. No kêr mẽ panhõ krĩ kumrêx koja jar mẽ panhõ krĩ rom aa hapêx kêr nê. Tã tãm na pu mẽ kormã ma hwỳr papa kaxyw arĩ amnhĩ tã Tĩrtũm jamār o papa.

¹⁵ Nê na htem Ijaew arĩ ohtô nê amnhĩ pãnhã Tĩrtũm mã mry hpar ho pa. Nom mẽ papajaja kot puj mẽ axte ã amnhĩ nhĩpêx anhỹr hkêr nê. Kot puj mẽ ãm Jejus kukwak ri Tĩrtũm mã mex o mex ã harênh rãhã ho măn papa. Jao te mẽ pahte kãm hkĩnh xà nhõr pyræk o amnhĩ nhĩpêx.

¹⁶ Nê kêr pu mẽ arĩ axpên to mex o ri axpên kôt papa. Nê kê mēhõ kêp amrakati japêr ka ja hã omu nê amnhĩ kutã kãm anhõ mēmoj kwỳ. ã kot puj mẽ axpên nhĩpêx anhỹr rãhã ho ri axpên kôt papa. Kot puj mẽ anê nê te mẽ pahte Tĩrtũm mã hkĩnh xà nhõr pyræk o amnhĩ nhĩpêx. ã mẽ pahte amnhĩ nhĩpêx anhỹrja na mex o mex.

¹⁷ Nê kêr ka mẽ Kris kôt mẽ akrãhtũmjê kapêr ma nê mẽ hkôt amnhĩ nhĩpêx mex nê. Na htem Tĩrtũm mã mẽ ajamār o ri mẽ akôt pa. Koja mẽ nhỹrmã mẽ kot tanhmã mẽ anhĩpêx to hã Tĩrtũm mã amnhĩ jarê. Jakamã mẽ kãm mẽ ato ajuta prãm. Tã kêr ka mẽ kapêr ma nê mẽ hkôt ri amnhĩ nhĩpêx mex o ri apa. Kêr kê mẽ amnhĩ tã mẽ apumu nê hkĩnh nê. No kot kaj mẽ ama nê ãm mẽ ama nhũm mẽ tee ri

amnhĩ tã mẽ apumu nẽ hkaprĩ nẽ. Jao tee ri kot tanhmã mẽ ato ajuta mex to hkukamã hamaxpêr.

¹⁸ Nẽ kwa kêr ka mẽ ixto Tĩrtũm wỳr rãhã ho apa. Inhmã Tĩrtũm noo mã tanhmã amnhĩ tomnuj to hprãm kêr. ãm inhmã amnhĩ to mex pix o ri ixpa hprãm.

¹⁹ Nẽ kêr ka mẽ ixto awỳ kê tokyx akupỹm mẽ awỳr inhmẽ. Na pa ra inhmã mẽ apumunh prãm tỳx nẽ.

Kagà nhĩpêx xwỳnh kot tanhmã mẽ ho Tĩrtũm wỳr to hã harẽnh

Epes 3.14-19; Piripos 1.0-11; Wam Tesarôn 3.9-13, 5.23; Sikũn Tesarôn 1.11-12, 2.16-17

²⁰ Nẽ mẽ panhõ Pahihti Jejus Krisja na hte mẽ panhĩpêx o te ôwêhti jamãr xwỳnh kot hkrit jamãr pyràk o pa. Jakamã kêp mẽ pajamãr xwỳnh maati mex na. Na pre mẽ panê ty nhũm Tĩrtũm akupỹm mẽ pamã ho htĩr nẽ mẽ pamã harẽnh o:

—E ra Ixkra kot mẽ anê htyk jakamã kêr ka mẽ ãm ixkapêr nyw kôt pix mã ri amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nẽ nhỹrmã ty pa akupỹm mẽ ato mẽ atĩr ka mẽ ixri atĩr tũm nẽ apa ho apa. Anẽ.

Tĩrtũm kêp mẽ pahto mẽ pajamakêtkati nẽ ri mẽ papa xwỳnh na. ²¹ Tã na pa hte tanhmã mẽ ato hwỳr to ho ixpa nẽ mẽ ato hwỳr o:

—Pa Tĩrtũm. E kwa tanhmã ixkwỳjê ho mex to kê mẽ kãm akapêr kôt pix mã amnhĩ nhĩpêx o pa hprãm. Nẽ mẽ kãm tãm amnhĩ nhĩpêx o pa hprãm. Nẽ kê Jejus haxwỳja tanhmã mẽ ho mex to kê mẽ war amã hprãm xà hkôt pix mã war amã tanhmã ri amnhĩ nhĩpêx to ho pa. Anẽ.

E kêr pu mẽ arĩ Jejus Kris mã mex o mex ã harênh rãhã ho papa.

Kagà jatur xà kamã mẽmoj jarênh

²² E Kris kôt ixkràmnhwýjaja. Nà na pa ã mẽ amã kagà nhĩpêx anê. Jejus kôt mẽ ato mẽ axihtýx kaxyw. No na pa ho ry nê hipêx kêt nê. Ixte ho grire nê hipêx jakamã kwa kêr ka mẽ kamã harê nê mar týx nê hkôt amnhĩ nhĩpêx mex o ri apa.

²³ Nê măn ka mẽ ra Ximotre jarênh mar japêr. Na pre Kris ã mẽ hagiênh xà kamã hkrĩ hã apkati xohtô nê. Tã nhũm xep mẽ ra kator. Tã koja kormã mẽ awýr inhmõr xwýj ri man ixwýr mỗ nê hpôx japêr kot paj ma amnhĩ kôt mẽ awýr o mỗ ka mẽ omu.

²⁴ Nê kêr ka mẽ kot Kris mã mẽ ajamãr xwýnhjê mã ijarê. Nê atar Tĩrtũm krajê piitã mẽ kãm ijarê.

Nê ota jar Tĩrtũm kra hkwýja piitã mẽ awýr hpêr mẽ.

²⁵ E kê Tĩrtũm mẽ apiitã mẽ ato mex o pa. Tã ãm ja pix. Na pa ã mẽ amã hã kagà ho anê. Na hapêx.

Tĩrtũm kapër ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

383a4e22-34cd-505f-9cc2-2f9921e7aa9f